





# RIEKTAČÁLLINRÁVVAGAT

Sámediggi

Dohkkehuvvon 2015  
Redigerejuvvon 2019

## SISDOALLU

1 GASKAMEARKKAT	6
1.1 Rihkku	6
Cealkagiid sirremis	7
Cealkaga lađđasiid sirremis	8
Gohčumis, čurvemis ja njuolggoovdanbuktimis	9
Loguid oktavuođas	9
Goas eat ane rihku	10
1.2 Čuokkis	11
Muitalancealkaga loahpas	11
Áiggi almmuheamis	12
Ortnetloguin (ortnetadjektiivvain)	12
Eará oktavuođain	13
Goas eat ane čuoggá	13
1.3 Golbma čuoggá	13
1.4 Beallečuokkis	14
Cealkagiid gaskkas	14
Logahallamis	15
Sátnegirjiin	15
1.5 Gažaldatmearka	16
Njuolggogažaldaga loahpas	16
Retoralaš gažaldagain	17
Eará mearkkaid oktavuođas	17
1.6 Čuorvvasmearka	18
Čurvemiin	18
Retoralaš gažaldagain	19
Reivve álggus	19
1.7 Duppalčuokkis	19
Sitáhta ovddabealde	19
Oanádusaid ja loguid oktavuođas	20
Čilgehusaid ja ovdamearkkaid ovddabealde	20
Duppalčuokkis eará oktavuođain	21
1.8 Aisttonmearkkat	21
Sitáhtain	22
Namain	23

Eará oktavuođain	23
1.9 Goallossáhcu	24
Goallossáni osiid gaskkas	24
Reduplikatiiva sániin	25
Olbmonamain ja fuolkevuodanamahusain	25
1.10 Jurddasáhcu	26
Gaskkaid almmuheamis	26
Cealkaga botkemis	27
Aisttonmearkkaid sajis	28
Loguid geardduheapmi bustávaiguin	29
Ruđa dárkuheamis	29
Falástallanbohtosiin	29
Listemis	29
1.11 Finjusáhcu	30
'dahje'-mearkkašumis	30
Sálbma- ja lávllalinjáid sirremis	31
'juohke'-mearkkašumis	31
Áigealmmuuheamis	31
Cuovkamearkan	31
Eará oktavuođain	32
1.12 Ruođut	32
Dávgeruođut	32
Roahkkeruođut	34
2 EARÁ MEARKKAT	36
2.1 Apostrofa	36
2.2 Akseantamearka	36
2.3 Gravismearka	37
2.4 Juolgenohtamearka	37
2.5 Paragráfamearka	38
2.6 Proseantamearka	38
2.7 Mearkkaid gaska	39
Mihtuid, deattuid ja sullasaččaid mearkkat	39
3 SÁNIT	40
3.1 Vierissánit ja loatnasánit	40
Vierissániid heiveheapmi	40

Vierissániid sojaheapmi	41
Eará gielaid olbmonamaid sojaheapmi	42
3.2 Sátnejuohkin	46
Konsonántaguovddáža juohkin	46
Vokálaid juohkin	47
3.3 Stuora álgobustávat ja unna álgobustávat	47
Stuora álgobustávva	48
Unna álgobustávva	51
3.4 Logut	53
Nummarat vai bustávat?	53
Bustávaiguin čállojuvvon logut: oktan vai moaddin sátnin?	55
Stuora logut ja desimálalagut	56
Beaivádeapmi	57
Loguid sojaheapmi	58
3.5 Goalossánit	60
Goalossáni ja sátnegihpu erohus	60
Mat eai leat goalossánit	62
Goalossániid čállin	62
Goalossáhcu goalossáni osiid gaskkas	63
Guoros gaska goalossázú buohta	65
3.6 Laktapartihkkalat	66
4 OANÁDUSAT	69
Initiálaoanádusat ja akronymat	71
Initiálaoanádusaid ja akronymaid sojaheapmi	73
Eará gielaid initiálaoanádusat	74
Dávjá geavahuvvon oanádusat	74
GIRJJÁLAŠVUOHTA	84

## OVDASÁTNI

Čállingiella lea sohppojuvvon giella mánjga mearkkašumis. Čállinvuohki lea soahpamuš mo giela jietnadagat galget čállojuvvot. Davvisámegiela dálá čállinvuohki sohppojuvvui Norgga, Suoma ja Ruota beale davvisámegiela oktasaš čállinvuohkin 1978:s. Čállinvuogi čuovvun lea álki dan dáfus go dan lea sámi alimus oktasaš giellaorgána, Sámi giellalávdegoddi, mearridan. Eará čállingiela norpmat eai leat álo vuodđuduuvvon seammalágan mearrádusaide, baicce norpmat leat hápmašuvvan ja buori muddui dohkkehuvvon dađe mielde go sámegiella lea ožzon nannošet saji čállingiellan, earenoamážit oahppogirjegiellan, čáppagirjjálašvuodđagiellan ja mediagiellan. Guhkit áiggi geavahus sajáiduhttá dihto málliid mat áiggi mielde doaibmagohtet norbman. Čállingiela systemáhtalaš normeren duddjo gielladutkamii vuodđuduuvvon giellaoahpaid ala.

Geahpidan dihte čállinbarggu lea maiddái dárbu riektačállinrávvagiidda, ja daid maid sáhttá jurddašit moatteláganin. Čállimis sáhttá dárbašit rávvagiid mo formálalaččat hábmet čállosa, ovdamearkka dihte goas geavahit stuorabustáva, mo geavahit čuorvvasmearkka, gokko bidjet rihku, mo čállit oanádusaid ja mo merket daid sojahusa. Riektačállinrávvagat sáhtášedje maid leat dakkárat mat muitalit ovdamearkka dihte makkár synonymaid sáhttá geavahit ja mo sáhttá cealkkaráhkadusaiguin varieret teavstta. Sáhtášii maid leat sáhka das ahte mo vealtat vierisgiela váikkuhusain go čállá. Dákkár áššiid rávven lea oassi das mii gohčoduvvo gielladikšumin. Dán riektačállinrávagirjjis leat guovddážis formálalaš rávvagat iige gielladikšun.

Riektačállinrávvagat ii leat giellaoahppagirji. Danin dása eai leat sátneluohkát eaige sojahanminstarat válđojuvvon mielde. Dan sadjái go geardduhit giellaoahpaid sojahanminstariid, de sáhttá čálli gávdnat sojahanminstariid giellaoahppogirjjiin. Čállingiela sojahanhámiid norbman sáhttá atnit daid sojahanhámiid mat Konrad Nielsena giellaoahppogirjji rájes leat geavahuvvon sániid sojahanminsttarin (dálá čállinvuohkái heivehuvvon). Nu sáhttá čállingiela norbman atnit daid sojahanhámiid mat eai leat oaniduvvon (merkejuvvon ruođuid sisá dálá giellaoahppogirjjiin, ovdamearkka dihte Nickel ja Sammallahти 2011). Go giellaoahpaid sojahanhámiin leat suopmanvariánttat, de berre čálli válljet sojahanhámiid maid dasto geavaha miehtá čállosa.

Sámeigela čálldiela nannema várás dárbbasuvvojít rávvagat mo geavahit čállinmearkkaid, mo vierissániid ja namaid heivehit sámegillii, mo juohkit sániid, goas geavahit stuora ja unna álgobustáva, mo čállit ja sojahit loguid, mo geavahit oanádusaid ja mo ja goas čállit goallossániid. Dáid rávvagiid čuovvun duddjo oktasaš málle normerejuvvon čálldiela geavaheampái, mii lea sihke ávkkálaš ja dárbbaslaš earenoamážit oahppogirjeteavsttain. Go olmmoš beassá hárjánit lohkai ja čállit teavsttaid mat leat hábmejuvvon oktasaš norpmaid mielde, de lea maid buoret doaivva ahte čálldiella bissu ja ovdána oktasaš gulahallanvuohkin.

Čállosiid hábmen lea dan duohken makkár teakstatiippas lea sáhka. Reive hábmejuvvo eará láhkai go bargooohcamuš, iige biebmoráhkadanráva hábmejuvvo seamma láhkai go aviisakronihkka. Dáin riektačállinrávvagiin leat dušše dakkár rávvagat mat leat buori muddui ovttaláganat buot teakstatiippaide. Diedalaš čállosiid várás leat rávvagat mo merket gáldogeavaheami ja mo hábmet gáldolisttu (gč. interneahtas Sámi diedalaš áigečállaga čállinrávvagiid). Seammá gáldomerkenrávvagiid sáhttá maiddái geavahit oahppogirjeteavsttain.

Sámedikki ásahan bargojoavkkus leat leamaš mielde Else Turi, Johanna Johansen Ijäs, Karen Juuso Baal, Ole Henrik Magga, Kaisa Rautio Helander, Inger-marie Oskal, Nils Øivind Helander, Inga Hætta Skarvik, Lisa Monica Aslaksen, Anne Britt Klemetsen Hætta ja Marit Eira Gaino.

Sámi Giellagáldu davvisámi giellajuogus lea redigeren dán girjjáža neahttaveršuvnna 2019:s.

# 1 GASKAMEARKKAT

## 1.1 Rihkku ,

Rihku geavahanvuogit leat guovtteláganat: formála ja funktionála rihkkomerkenvuohki. Formála rihkkomerkenvuogi cealkkaaoahpalaš ráhkadusat mearridit gokko biddjo rihkku. Dakkár rihkkomerkenvuohki eaktuda cealkkaaoahpalaš máhtu nu ahte máhttá earuhit válndocealkagiid, oalgecealkagiid ja relativacealkagiid ja nu dovdat cealkagiid ja cealkkaosiid oktavuođaid. Funktionála rihkkomerkenvuogi mielde rihkku biddjo dušše gokko lea dárbu lohkama ja ipmárdusa dihte. Dán guovtti merkenvuogi stuorámus erohusa oaidná das ahte formála merkenvuogi mielde biddjo rihkku oalgecealkaga ja relativvacealkaga ovddabeallai.

### Cealkagiid sirremis

#### Rihkku biddjo dievaslaš válndocealkagiid gaskii.

*Elle bodii mánáinis jo juovlamánu, ja earát fas gárte vuordit gitta guovvamánnui.*

*Máhtte čálili teavstta, Elle fas heivehii dan nuhttii.*

*Máhtte márfu, Elle bassá, ja Biera čorge ovdal go mii vuolgit.*

*Muhtumat lohket, earát čállet.*

*Mun liikon čuoigat, ja Máret fas liiko viehkat.*

*Sii muitaledje maid doppe ledje gullan, muhto Ánde gal ii orron jáhkkimin dasa.*

#### Rihkku sáhttá biddjot oalgecealkaga ovddabeallai.

*Buohkat ain čohkkájedje mielleravdas ja vuorddašedje, vaikke leige jo arvigoahtán.*

dahje

*Buohkat ain čohkkájedje mielleravdas ja vuorddašedje vaikke leige jo arvigoahtán.*

*Guovssu lei juo vudjon, go mii gearggaimet goadi dahkamis.*

dahje

*Guovssu lei juo vudjon go mii gearggaimet goadi dahkamis.*

*Mii lávet herskkostallat juohke háve, go áhčíi boahtá barggus.*

dahje

*Mii lávet herskkostallat juohke háve go áhčíi boahtá barggus.*

*Guvssi lea duddjon Márjá, geas lea duodjeoahppu, ja gii lea orron máddin juo máŋga jagi.*

dahje

*Guvssi lea duddjon Márjá geas lea duodjeoahppu ja gii lea orron máddin juo máŋga jagi.*

## Rihkku galgá biddjot oalgecealkaga maŋnái.

*Ahte nu galggai geavvat, dan ii lean gal oktage árvidan.*

*Go áhčíi boahtá, de mii herskkostallat.*

*Jos mii dalle eat livčče vuolgán ruoktot, de gal leimmet gártat vuordit máŋga beaivvi.*

*Vaikke ledjege váiban, de dat dattetge ain jotke.*

## Cealkaga laddasiid sirremis

### Rihkku sirre cealkaga apposišuvnnaid ja aiddostahttimiid.

*Inǵá, ovddit jagiid gilvvuid vuotti, bodii dán háve goalmádin.*

*Máret, son lea oalle gávvil.*

*Mu nuoramus bárdni, Máhtte, lea doavttir.*

*Odne lea gaskavahkku, suoidnemánu 8. beaivi.*

*Okta ii boade, Ánne boadnji.*

*Olu olbmot, earenoamážit sápmelaččat, dorjot evttohusa.*

*Son dat gal lea vuogas olmmoš, Máreha odda irgi.*

*Vuolgu fal muhtun dálui, ovdamearkka dihte Ántte dálui.*

*Ánne, gií lea hui váibmil borramuššii, lea buidon.*

*Sánit sáhttet šaddat nu ovttaláganat ahte dábálaš olbmot, geat ieža eai leat tearbmabarggus leamaš, eai šat ipmir sániid.*

Apposišuvnnaid ja aiddostahtimiid oktavuođas sáhttá rihku sajis muhtomin atnit ruođuid.

*Juvvá (gean gástanamma lea Johan Olsen) lea Jáhkovuonas eret.*

**Rihkku sirre buohtalas osiid (go ii geavahuvvo konjunkšuvdna).**

*Ánte Hætta, Suomaluodda 1, 9730 Kárásjohka  
boares, ruston biila  
mađi álbmát, dađi buoret  
Oastte láibbi, mielkki, vuosttá ja márffiid.  
Sámi searvvi ovdaolmmoš, Sámi allaskuvlla vuosttašamanueansa Ánte Hætta  
Son goarui gápmagiid, bittuid ja beaskka.*

**muhto-kunjunkšuvnna ovddabeallai biddjo rihkku.**

*Son livčëii gal višsal, muhto sus ii leat goassege dilli bargat.  
Olgoriikkas ii oahpa dušše giela, muhto ollu eanetge.*

**Gohčumis, čurvemis ja njuolggoovdanbuktimis**

*Áhkku, boade!*

*Hei surgat, lea divrras!*

*Lagat, Måret, gáfeseahka!*

*"Lea ártet", jurddašii Ánte, "go nie gillejit láhttet."*

*"Viellja lea hilbat", váidalii Elle.*

*Vuoi, vuoi, man hejot duinna geavai!*

### **Loguid oktavuodas**

*4,3 m*

*19,2 sek*

*Joh 1,28* (Johannes evangelium, 1. kapihtal, 28. vearsa)

**Fuomáš:** Eat ane guoros gaskka desimálarihku maŋábealde (*10,50 kr*) eat ge biibbalčujuhusain (*Joh 3,16*).

### **Goas eat ane rihku**

#### **Cealkagjid gaskkas main lea oktasaš cealkkaoassi**

*Elle finai vuos buvddas ja de manai ruoktot.* (Oktasaš subjeakta)

*Johan áiggui váldit eksámena ja mun maid.* (Oktasaš verbála ja objekta)

*Máhtte manai oarjjabeallai ja Biera nuorttabeallai.* (Oktasaš verbála)

### **Oanehis cealkagiin**

*Dat vulggi go mun bohten.*

*Soai gáttiiga ahte busse lei jo mannan gávpogii.*

### **Guovtti konjunkšuvnna gaskkas**

*Ledjen vuolgán, muhto go biekkastii, de jorggihin.*

*Son logai ahte jus dál it doama, de bázát.*

## Cealkkavástagiiid oktavuodas

*Máhtte logai ikte juo nohkan mielkki.*

*Son logai iežas bargan buot.*

## Gažaldatmearkka ja čuorvvasmearkka maŋis

*"Manne lea málbmi jorbbas?" jearai mánná.*

*"Vuoi daid čáppa lábbáid!" čurvii áhkku.*

## Beaivádemiid oktavuodas

*Buolbmágis juovlamánu 3. beaivvi 1995*

*Buolbmágis juovlamánu 3 beaivvi 1995*

*Buolbmágis 2015-03-15*

Muhtomin leat ruođut ja rihkku oktanaga, namalassii dalle go cealkka goitge livčii gáibidan rihku almmá ruođuid haga nai.

*Eahkes go vuoddját (dii. 19.00:s), de fertejit buohkat leat gergosat.*

*Mii vuoddját eahkes (dii. 19.00:s), bodeš dal gii boahtá.*

## 1.2 Čuokkis

### Muitalancealkaga loahpas

*Elle vázzá olgun.*

**Fuomáš:** Muitalancealkaga lohppii čállojuvvo čuokkis maiddái dalle go cealkaga loahpas lea ovdamearkka dihte neahhtačujuhus dahje oanádus masa ii muđui gula čuokkis.

*Lassidiedžuid gávdná Oulu universitehta Giellagas-instituhta neahttiiddus man čujuhus lea <http://www.oulu.fi/giellagas>.*

*Sekundda oanádus lea sek.*

### **Áiggi almmuheamis**

Áiggi almmuheamis atnit čuoggá diimmuid ja minuhtaid gaskkas, ja minuhtaid ja sekunddaid gaskkas.

*Skuvla álgá dii. 08.30. (dahje 8.30)*

*Son ádjánii 2.08.03. (2 diimmu, 8 minuhta ja 3 sekundda)*

**Fuomáš:** Go áiggis leat mielde sihke diimmut, minuhtat, sekunddat ja vaikko vel logádassekunddat nai mat leat vuollel logi, de čállit nolla maid minuhtta-, sekunda- ja logádassekundalohkui.

**Fuomáš:** Logádassekundaosiid ovddabealde ii leat čuokkis, muhto rihkku.

*3.08.03 (golbma minuhta, gávcci sekundda ja golbma logádassekundda)*

### **Ortnetloguin (ortnetadjektiivvain)**

Ortnetloguid (ortnetadjektiivvaid) merket nu, ahte čállit logu manjái čuoggá. Ortnetloguid (ortnetadjektiivvaid) manjábeallai bidjat ovtta guoros gaskka.

*Ášši lea čilgejuvvon 57. siiddus.*

*Odne lea oððajagemánu 27. beaivi.*

*Ovllá-Mikku válljejuvvui 12. sáttaolmmožin.*

**Fuomáš:** Go ortnetlogut (ortnetadjektiivvat) merkejuvvojit romalaš loguiguin, de daid maŋŋái eat čále čuoggá.

*Gonagas Erik XIV*

*Poava emeritus Benedikt XVI lei katolalaš girku 265. poava.*

#### **Eará oktavuodain**

Go girjji namas leat guokte oasi, de osiid gaskii sáhttá bidjat čuoggá dahje jurddasázu.

*Giella vákkis vággái. Gáivuona dialeavtta suokkardallan*

*Giella vákkis vággái – Gáivuona dialeavtta suokkardallan*

#### **Goas eat ane čuoggá**

Čuoggá ii galgga bidjat girjjiid ja kapihtaliid namaid, bajil- ja vuolláičállosiid, čujuhusaid ja dakkáriid maŋábeallai, go teakstaoasit muđui leat sirrejuvvon teavsttas.

*Muitalus sámiid birra*

Eat bija liigečuoggá go cealkaga loahpas lea oanádus mas lea čuokkis.

*Mánát ožžot spáppastallat, olgun viehkat jna.*

## 1.3 Golbma čuoggá ...

Golbma čuoggá merkejit ahte sátni, cealkka dahje dajaldat ii leat loahpahuvvon. Golmma čuoggá gaskkaide eat bija guoros gaskka.

Jus sátni botkejuvvo, de golbma čuoggá cállit njuolga maŋimuš bustáva maŋjái.

*Diet jal... ii ipmir ii maidege.*

*Bear...!*

Jus cealkka botkejuvvo, de bidjat gaskka sáni ja čuoggáid gaskii, muhto golmma čuoggá maŋjái eat bija cealkaga loahpahančuoggá.

*Ánte dat lei gal, muhto ...*

*Boađát go, vai ...?*

*Guobbal eret, fasttaha ...!*

Go golmma čuoggá maŋábealde lea sátni dahje cealkka, de galgá guođđit ovtta guoros gaskka ovdal sáni dahje cealkaga.

*Son šuohkikhii ... Dasto vástidii: Áiggun!*

Jus golmmain čuoggán merke ahte sitáhtas lea juoga guđđojuvvon, de golbma čuoggá biddjojit roahkkeruođuid sisá.

[...] ferte gal dáhpáhuvvat searválagaid álgoálbmogiiguin iežaineasetguin [...]

Teáhterhoavda muittuhii [...], ovdal go čájálmas loahpahuvvo.

## 1.4 Beallečuokkis :

### Cealkagiid gaskkas

Beallečuoggá sáhttá muhtomin atnit cealkagiid gaskkas, dábálaččat váldocealkagiid gaskkas, maid ii leat lunddolaš sirret čuoggái. Beallečuoggá bidjat álohii ruođuid olggobeallai.

*Biera ii boade čoahkkimii; son lea buohcci.*

*Mun bohten maŋŋit (mus billahuval biila); muhto čoahkkin gal álggi dan dihte.*

Beallečuoggá sajis sáhttá álo atnit čuoggá, muhtomin rihku dahje jurddasázu. Beallečuokkis ii adno nu dávjá. Beallečuoggá maŋábeale sátni álggahuvvo unnabustávain (go fal ii leat namma).

### Logahallamis

Go logahallá máŋggaoasat dieđuid maid gaskkas lea rihkku, de dieđuid gaskii biddjo beallečuokkis.

*Sii välljejuvvojedje: Biret Eira, 25 jagi, ovdaolmmoš; Pekka Lahtinen, 36 jagi, čálli;*

*Olle Andersson, 59 jagi, rehketdoalli.*

Go logahallá loguid main lea rihkku, de loguid gaskkas adno beallečuokkis.

2,9; 3,2; 4,7; 7,3; 8,9 ja 10,3

## Sátnegirjiin

Sátnegirjiin beallečuokkis sirre sániin iešguđetlágan mearkkašumiid.

**gazza** *s.* negl; klov; hov

**gálgu** *s.* vaimo; eukko

**veadjit** *v.* klare, greie, orke, makte; kunne

**veadju** *s.* vointi, voimat; mahdollisuus

**jorgalit** *v* vända, sno; översätta

**Fuomáš:** Rihkku sirre synonymaid.

## 1.5 Gažaldatmearka ?

### Njuolggogažaldaga loahpas

Gažaldatmearka adno njuolggogažaldaga loahpas.

*Oainnát go Elle?*

*"Goas son olle?" jearai Ánne, "mun ferten suinna dakkaviđe hupmat."*

Jus dadjosis leat moadde gažaldaga, de gažaldatmearka biddjo easkka dadjosa lohppii.

*Gávdnet go spáppa vai lea go láhppon?*

*Ovllá go dien logai vai Lemet go?*

*Vuolggát go odne vai vuorddát go ihttážii?*

**Fuomáš:** Eahpenjulges gažaldaga lohppii ii biddjojuvvo gažaldatmearka.

*Ánne jearai goas dat olle.*

Dábálaččat galgá okta guoros gaska gažaldatmearkka maŋábeallai (muhto ii ovddabeallai).

*It go sáhte doapmat? Munnos lea hoahppu.*

### **Retoralaš gažaldagain**

Dakkár gažaldagaide maidda ii vuordde vástádusa, sáhttá bidjat gažaldatmearkka dahje čuorvvasmearkka.

*Leat go don oalát dájáskan?*

*Leat go oaidnán vearrábu!*

### **Eará mearkkaid oktavuodas**

Gažaldatmearkka mii gullá sitáhtii, biddjojuvvo aisttonmearkkaid siskkobeallai.

*Mánná jearai: "Lea go du namma Ánne?"*

Go gažaldatmearka ii gula sitáhtii, de dat biddjojuvvo aisttonmearkkaid olggobeallai.

*Leat go gullan presideantta dadjame "Mii fertet vuoruhit ášši"?*

Gažaldatmearkkaid bidjat ruoduid siskkobeallai go gullet lasáhussii dahje coggaluvvon cealkagii.

*Mun luiken dutnje biilla (muittát go?), mas lei bensiidna dievva táŋkka.*

Muhto:

*Oaivvildat go duodas dan (geahča maid čállet girjái)?*

## 1.6 Čuorvvasmearka !

### Čurvemis

Čuorvvasmearka atnit čurvemiid, gohčumiid ja sávaldagaid majábealde. Čuorvvasmearka majábeallai guođđit dábálaččat ovtta guoros gaskka, muhto eat ovddabeallai. Go čuorvvasmearka majábealde lea aisttonmearka, de čuorvvasmearka ja aisttonmearka gaskii ii galgga guođđit guoros gaskka.

*Vare don boadášit juo ihttin! Lean vuordán du nu guhká.  
"Mana dearvan! Čális fargga!" čurvii Ánne.*

Go leat mánga čurvema, gohčuma ja dakkára main lea oktiigullevaš sisdoallu, de atnit dušše ovtta čuorvvasmearka.

*Orrot jaska ja čohkkedehket ovttatmano!*

Jus gohčumiid háliida sierra deattuhit, de čuorvvasmearka biddjojuvvo goappašagaide.

*Orrot jaska! Čohkkedehket ovttatmano!*

Go čurvencealkaga manjel lea bálddalas váldocealkka mii ii leat čurvencealkka, de dábálaččat cealkaga loahpas ii galgga leat čuorvvasmearka.

*Doama, in astta veavdit.*

Sáhttá maid čállit dákkár cealkagiid guoktin cealkkan.

*Doama! In astta veavdit.*

Čuorvvasmearkkaid bidjat ruođuid siskkobeallai go gullet lasáhussii dahje coggaluvvon cealkagii.

*Don áigot geargat ovdal borgemánu (muitte dan!), it ge ájahallat.*

#### **Retoralaš gažaldagain**

Retoralaš gažaldahkii sáhttá bidjat čuorvvasmearka gažaldatmearkka sadjái.

*Leat go jalla!*

#### **Reivve álggus ja dearvvaheamis**

Reivve álggus ja dearvvaheamis sáhttá bidjat čuorvvasmearka, muhto ii dárbaš makkárge mearkka bidjat.

*Ráhkis Juhán!*

*Buorre Iŋgá*

*Bures boahtin*

*Mana dearvan!*

## 1.7 Duppalčuokkis :

### Sitáhta ovddabealde

Sitáhta ja njuolggogeardduheami ovddabealde atnit duppalčuoggá. Duppalčuoggá manjábealde (muhto ii ovddabealde) adnojuvvo okta guoros gaska.

*Son dajai váimmustis: "Oskkun."*

*Elle jearai: "Leat go luopmánat láddan?"*

*Čuožžu čállojuvvon: "Eai dus galgga leat eará Ipmilat go mun."*

*Mun jurddašin: "Gal dat liigu vuolgit."*

*Johan Turi álggaha girjjis ná: "Mun lean okta sápmelaš, guhte lean bargan visot sámiid bargguid, ja mon dovddan visot sámiid dili."*

**Fuomáš:** Duppalčuokkis ii adnojuvvo dalle go sitáhtta dahje eará ii leat olles cealkka.

*Lukkari čállá boskka birra ahte dan geavahedje "gosahahkii ja dat galggai leat vuššojuvvon".*

**Fuomáš:** Rámmacealkaga lohppii ii galgga bidjat duppalčuoggá go dan manjis lea sitáhta.

*"In", vástidii son, "jáhke mun diesa."*

## Oanádusaid ja loguid oktavuodas

Duppalčuoggá atnit go laktit oanádusaide ja loguide kásusgehčosa. Dalle ii galgga leat guoros gaska dupalčuoggá goappáge bealde.

*NSR:i, 1989:s*

## Čilgehusaid ja ovdamearkkaid ovddabealde

Duppalčuoggá atnit maid logahallamiin, ovdamearkkain, čilgehusain ja dakkáriin. Duppalčuokkis adnojuvvo dalle seamma mearkkašumis go sánit *namalassii*, *nappo* ja *ovdamearkka dihte*.

*De mii fuomášeimmet: Olmmái lea bealjeheapme.*

*Dat dagaiga nugo dábálaččat: Bodíiga beare manjxit.*

*Son borai dan maid lávii borrat: pizza.*

*Sáhtát geavahit dáid ivnniid: ruoksada, fiskada ja alihá.*

**Fuomáš:** Adnojuvvo rihkku ii ge dupalčuokkis, go čilgehusaid, ovdamearkkaid ja dakkáriid ovddabealde leat sánit *namalassii*, *nappo* ja *ovdamearkka dihte*.

*Gustu lea juoigan olu riikkain, ovdamearkka dihte Frankriikkas, Belgias, Ruotas ja Norggas.*

## Duppalčuokkis eará oktavuodain

Duppalčuoggá sáhttá atnit gáldolisttuin girječálli nama ja girjenama gaskkas. Dan sáhttá maiddái atnit girjelágadusa ruovttubáikki ja girjelágadusa nama gaskkas.

*Sara, Máret Ánne 2013: Ilmmiid gaskkas. Guovdageaidnu: DAT.*

Duppalčuokkis adnojuvvo juohkinmearkan ja loguid gori merkemis, ovdamearkka dihte mihttolávvan kártaas. Dalle lea guoros gaska duppalčuoggá goappáge bealde.

$$\begin{aligned}15 : 3 &= 5 \\1 : 50\,000\end{aligned}$$

## 1.8 Aisttonmearkkat

” ”

Aisttonmearkkaid gohčodit maiddái sitáhttamearkan ja čuonjáčalbmin. Aisttonmearkkaid hápmi rievddada iešguđet gielain: Sámegielas čállit daid seammaládje go ruota-, dáro- ja suomagielas, ná: ”sátni”, muhto eŋgelasgielas dat čállojuvvojit ná: ”word”.

### Sítáhtain

*Son gohčodii mu ”dikkárin ja heajos olmmožin”.*

Aisttonmearkkaid bidjat sitáhtaid álgui ja lohppii.

*”Mun in jeagat”, dajai bárdni.*

Aisttonmearkkaid atnit maid go sitáhtta lea teavstta siste:

*Vaikko anii ge barggu ”joavdelassan ja váivin”, de barggai son goitge viššalit.*

Aisttonmearkkaid sajis sáhttá atnit jurddasázu; juohke odđa olbmo vuorrosátni lea odđa linjás.

– *Maid dál dagat? jearai Ánne. Fanas lea juo jođus.*

– *In merrii goit njuike, vástidii Biret.*

Jus sitáhta siste lea sitáhtta, girjenamma dahje eará dakkár, de galgá atnit apostrofai (eaŋkilmearkkaid).

*"Leat go oaidnán Raste Magga filmma 'Oregano' mii duvle čájehuvvui Helssegis", jearai báhppa.*

## Namain

Go teavsttas lea girjji, lávlagaa, gova, lága dahje dakkára (guhkes) namma, de dan sáhttá čállit aisttonmearkkaid sisa dahje čállit finjučállagiin sirren dihte nama teavsttas.

*Jovnna-Ánde Vest girji "Čáhcegáddái nohká boazobálggis" lea vuovdimassii girjegávppis.*

dahje

*Jovnna-Ánde Vest girji Čáhcegáddái nohká boazobálggis lea vuovdimassii girjegávppis.*

*Ráđđehusa neahttasiiddus lea "Láhka geassemánu 12. b. 1987 nr. 56: Sámedikki ja eará sámi vuogatvuodđaid birra (sámeláhka)" sámegiel jorgalus.*

dahje

*Ráđđehusa neahttasiiddus lea Láhka geassemánu 12. b. 1987 nr. 56: Sámedikki ja eará sámi vuogatvuodđaid birra (sámeláhka) sámegiel jorgalus.*

Aisttonmearkkaid čállit maid olbmuid liigenamaid ovdda- ja maŋábeallai.

*Ánte "Luhkkár" Hætta (muhto: Luhkkár-Ánte)*

Åsa "Sester" Aikio (muhto: Sester-Åsa)

### Eará oktavuodain

Go čálli háliida deattuhit iežas miellaguottu, de sáhttá dan merket aisttonmearkkaiguin.

*Son suoládii "dušše" čuodiduhát ruvnno.*

*Pizza dat lea "albma" borramuš!*

*Son "dinii báldá".*

### 1.9 Goalossáhcu -

Goalossáhcu lea oanehet go jurddasáhcu.

### Goalossáni osiid gaskkas

Goalossáhcu adnojuvvo goalossáni osiid gaskkas go nubbin oassin lea ovdamearkka dihte namma, nummar, bustávva, oanádus, vierrogiela sátni, mearka dahje eará giellaávnas.

*Elle-oambealli, Stuora-Joavnna, 50-evre, 1950-lohku, 1.-amanueansa, C-vitamiidna, e-boasta, A4-sturrodat, cm-oanádus, ON-beaivi, super-čáppat, §-mearka, s-geažus*

**Fuomáš:** Go loguid, mearkkaid ja dakkáriid čállit bustávaiguin, de ii biddjo goalossáhcu.

*vihtatalogievre, vuosttašamanueansa, proseantamearka*

Goallossázu atnit maiddái bálddalas goalossáni osiid gaskkas.

*sámi-ruota (sátnegirji)*

*dulka-jorgaleaddji*

Go goallosta goalossániid main lea oktasaš oassi, de atná goalossázu dan oasi sajis mii guđđojuvvo čálekeahttá (fuomáš guoros gaskka goalossázu ektui).

*čállin- ja lohkanmáhttu*

*muorjemeastu ja -sáhppi*

Gaskka geavaheami birra goalossázu oktavuođas, geahča 3.5-kapihtala.

#### **Reduplikatiiva sániin**

Reduplikatiiva (geardduheaddji) sániid gaskii bidjet goalossázu dalle go sáni álgoossi geardduhuvvo.

*may-mayjálaga, bál-bálddalaga, badje-badjálagaid, un-unnánaš, viso-visot*

#### **Olbmonamain ja fuolkevuodanamahusain**

Go olbmonamma lea goallosamma, de nama osiid gaskkas atnit goalossázu. Norgga ja Ruota bealde lea dábálaš čállit goalosnamaid maiddái sázu haga. Olbmo namat čállojuvvojit nugo nammaguoddit daid čállet.

*Máhtte-Ánte dahje Máhtte Ánte*

*Elle-Biret-Sárá dahje Elle Biret Sárá*

Go olbmonammii gullet ovddit buolvvaid olbmuid namat, de guđege buolvva olbmuid namaid gaskii ii čállojuvvo goallossáhcu.

*Heika-Máhte Máhtte-Ánte* (Máhtte-Ánte lea Heika-Máhte bárdni.)

*Kirstte Elle-Biret-Sárá* (Elle-Biret-Sárá lea Kirstte nieida.)

*Kirste-Márjjá Mágge Sunná-Máddji* (Sunná-Máddji lea Mágge nieida, ja Márge lea Kirste-Márjjá nieida.)

Go goargu dahje sohkanamma lea goallosnamma, de nama osiid gaskkas sáhttá atnit goallossázu: *Áile Guttorm-Blind* dahje *Áile Guttorm Blind*.

Olbmonama ja fuolkevuodanamahusa gaskii maid biddjo goallossáhcu.

*Juvvá-áddjá*

*Máret-Biret-goaski*

Fuomáš ahte muhtun namaid oktavuođas goallossáhcu sáhttá leat áidna mii ovdanbuktá nama(id) ja fuolkevuodanamahusa gaskavuoda.

*Elle-siessá* (Siesá namma lea Elle.)

*Elle siessá* (Siessala namma lea Elle.)

*Biret-Ánne-áhkku* (Áhku namma lea Biret-Ánne.)

*Biret-Ánne áhkku* (Áhku nama eat dieđe, muhto su áhkkut lea Biret-Ánne.)

*Biret Ánne-áhkku* (Áhku namma lea Ánne, ja son lea Bireha nieida.)

*Nigá Máhte Elle-Sárá* (Elle-Sárá lea Máhte nieida, ja Máhtte lea Nigá bárdni.)

*Nigá-Máhte Elle-Sárá* (Elle-Sárá lea Niga-Máhte nieida.)

## **1.10 Jurddasáhcu –**

Jurddasáhcu lea guhkit go goallossáhcu.

### **Gaskkaid almmuheamis**

Jurddasáhcu geavahuvvo mitalit gaskka man nu rájes man nu rádjai. Dalle ii leat gaska goappáge bealde jurddasázu.

*Romsa–Ivgubahta 120 km*

*9.00–14.15*

*vuossárga–bearjadat*

*siidduin 25–100*

*80–90 euro*

*Rámburáigi lávvordagaid: 9–13*

*Rabas 09–13*

Teavsttas lea vuohkkaseabbo čállit ná:

*Romssas Ivgubahtii lea 120 kilomehtera.*

*Rámbuvri lea rabas mánnodagas bearjadahkii.*

*Ášsi lea čilgejuvvon 25. siiddus 100. siidui.*

*Rámbuvri lea rabas ovccis ovtta rádjai.*

Go lea jurddasáhcu guovtti vuodđalogu gaskkas mat gullet ovtta jahkečuohtái, de sáhttá oanidit maŋibu.

Fuomáš erohusa 2–300 *olbmo* (guovttis gitta golmmačuođi olbmui) ja 200–300 *olbmo* (guokte-golbmačuođi olbmo).

**Fuomáš:** Láhkateavsttaid ja paragráfaid logahallamis adno maid muhtumin jurddasáhcu. Guđege riikkas sázuid atnet iešguđetládje, ja dan dihte čuovvut vuodđoteavstta riikka merkenmálle.

### Cealkaga botkemis

Jurddasáhcu adnojuvvo cealkaga botkemis. Jurddasáhcu sáhttá ovdamearkka dihte sirret lassi dajaldagaid, čilgehusaid, várremiid, oktiibidjamiid ja dakkáriid. Dalle lea jurddasázu goappáge bealde guoros gaska.

*Mii eat sáhte – eat jur dál – váldit badjelasamet lasi barggu.*

*Mun boadán – muitte fal dan – dakkaviđe go gearggan.*

Dáin ovdamearkkain jurddasázuid sajis sáhttá maid atnit rihkuid dahje ruođuid. Rihkku lea neutrálamus dán golmma čállinmearkkas; jurddasáhcu ja ruođut leat nanu sirrenmearkkat. Jurddasázut deattuhit liigečilgehusa, ruođut fas čájehit ahte liigečilgehus ii leat nu deatalaš.

**Fuomáš:** Ii galgga bidjet čuoggá lasáhusa maŋábeallai, vaikko livččii ge cealkka.

*Son čilgii midjiide – vai ipmirdivččiimet – dan sáni maid anii logaldallamis.*

Jus lasáhusas lea gažaldatmearka loahpas, de bidjet gažaldatmearka loahppajurddasázu ovddabeallai.

*Son oahpahii midjiide – muitibehtet go? – olmmošvieruid.*

Jurddasáhcu biddjo sáni dahje sániid ovdií maid ii áiggo čállit. Jurddasázu ovddabealde lea dalle nai guoros gaska.

*Gal diet gal lei dego –.*

### Aisttonmearkkaid sajis

Jurddasázu sáhttá atnit aisttonmearkkaid sajis; oðða ságastalli vuorrosátni lea oðða linjás. Dalle lea gaska jurddasázu ja teavstta gaskkas.

– *Maid dál dagat? jearai Ánne. Fanas lea juo jodus.*

– *In merrii goit njuike, vástdidii Biret.*

### Loguid geardduheapmi bustávaiguin

Go geardduhit loguid bustávaiguin, dalle bidjat gaskka jurddasázu ovddabeallai ja maŋábeallai.

*Son dini 21 000 – guoktelogiovttaduhát – ruvnno ja márssii 5 003 – vihtaduhátgolgma – ruvnno vearu.*

### Ruða dárrkuheamis

Jurddasáhcu adnojuvvo nollaíd sajis. Jurddasázu ovddabeallai ii galgga gaska.

99,- kr (dahje 99,00 kr)

67,- € (dahje 67,00 €)

## Falástattanbohtosiin

Jurddasázu goappáge beallai ii biddjo guoros gaska.

*Loahppačiekčamiid boadus šattai Guovdageaidnu–Kárásjohka: 2–1.*

*Fierrannjárga časkkii Báršši 5–0 gámabálkumis.*

## Listemis

*Hálbbiduvvon:*

- *hearvabáttit*
- *holberavda*
- *láddi*

## 1.11 Finju- dahjege njagusáhcu /

### 'dahje'-mearkkäsumis

Finju- dahjege njagusáhcu muitala molssaeavttuid ja máksá 'dahje'.

*mánát/nuorat* (mánát dahje nuorat)

*sihkkel-/skearrobálggis* (sihkkel- dahje skearrobálggis)

Dábálaš teavsttas lea dávjá vuohkkaseabbo atnit sáni *dahje* go finjusázu.

**Fuomáš:** Finjusáhcu ii mávsse 'ja', ja dan dihte lea buoret čállit ovdamearkka dihte *barggut maid mánát ja nuorat* sáhttet *bargat* go *barggut maid mánát/nuorat* sáhttet *bargat*.

Jus goappánai molssaeavttus (dahje buot molssaeavttuin) lea dušše okta sátni, de eat guođe gaskka goappáge beallai finjusázu.

*busse/girdi/fanas*

*náitalan/náitalkeahthes*

*dáro-/ruota-/suomagillii*

*ja/dahje*

Jus unnimusat ovttas molssaeavttuin leat guokte sáni dahje eanet sánit, de guođđit gaskka finjusázu(id) goappánai beallai.

*sádde ruovttoluotta / arkivere*

*boahtá / ii boađe*

#### **Sálhma- ja lávllalinjáid sirremis**

*Mun ilus juovlaruohta lean / go Jesus riegádii / go násti báittii šerrosit*

*Buohkat leat suo nohkadan / ládjoberggus viessalan*

**Fuomáš:** Lea guoros gaska finjusázu goappánai bealde.

#### **'juohke'-mearkkašumis**

*20 km/d (20 kilometra diimmus)*

*12 m/s (12 mehtera sekunddas)*

## Áigealmmuheamis

*2014/-15 skuvlajahki*

*2014/15 skuvlajahki*

**Fuomáš:** Go áigealmmuheamis lea olles kaleanddarjagiin sáhka, de berre atnit jurddasázu.

*1996–2000-áigodat*

## Cuovkamearkan

$\frac{1}{3}$ ,  $\frac{3}{4}$ ,  $\frac{7}{8}$

## Eará oktavuodain

*c/o* (engelas *care of*, nappo ”guhte orru dan olbmo luhtte”)

<http://www.samediggi.no/Giella/Stipeanda-ja-doarjja>

## 1.12 Ruodut

*(...) [...] {...} <...>*

Leat njealjelágan ruodut: dávgeruođut (...), roahkkeruođut [...], bárroruođut {...} ja čiehkaruođut <...>. Bárroruođut ja čiehkaruođut adnojuvvojit dábálačcat dušše fágačállosiin. Dás eat čilge daid anu.

Ruohtomearkkaid ja daid sisdoalu gaskii ii biddjo guoros gaska..

*Mun boadán (muitte fal dan), dakkaviðe go gearggan.*

## Dávgeruodut

Dávgeruoðuid atnit teakstaoasi birra mii lea lasáhussan, čilgehussan, molssaeaktun dahje čálli kommentáran.

*Dán rávagirji olis sáhttet boahtit váidalusat (ja vel áitagat ge).*

*Muhtumat leat gohčadan uksaráigge goallossátnin (substantiivan) ja muhtumat ges advearban.*

Go ruohkontaktesta lea sierra cealkkan, de čállojuvvo majit ruohtu loahppagaskamearkka – čuoggá, gažaldatmearkka dahje čuorvvasmearkka – manjábeallai.

*"Ellos Sápmi!" čurvo dalle. (Miellačájeheaddjit čurvo dan Čávžžus.)*

Jus ruohkontaktesta lea nuppi cealkaga oassin ja loahpaha dan, de bidjat loahpparuohtomearkka loahpaheaddji gaskamearkka ovddabeallai.

*Lei čielga ášši (dan doivo olbmot).*

Fuomáš ahte dákkár ruohkontakteavsttas lea unna álgobustávva, vaikko livčéii sáhttán leat sierra cealkkan. (Atnit stuora álgobustáva go vuosttaš sátni lea namma dahje eará sátni maid galgá čállit stuora álgobustávain.)

Gažaldatmearkka ja čuorvvasmearkka bidjat ruoðu manjábeallai, jus dat gullá olles cealkagii.

*Leat go oaidnán man fárta Máret-Birehis lea (sus gií viehká ovttain gápmagiin)?*

Jus gažaldatmearka ja čuorvvasmearka gullet ruođu sisdollui, de galget dat ruođuid sisa.

*Mun dohppehin stuora guoli (16-kilosačča!).*

*Doppe oidnui giehka (guovssat?).*

Ruođut leat dávjá rihku(id) sajis, ja nappo ii galgga atnit sihke rihku(id) ja ruođuid oktanaga.

*Juvvá (gean gástanamma lea Johan Olsen) lea Jákovaunas eret.*

*Juvvá, gean gástanamma lea Johan Olsen, lea Jákovaunas eret.*

*Bohten (vaikko in livčče nu hálidian) čoahkkimii.*

*Bohten, vaikko in livčče nu hálidian, čoahkkimii.*

Ruođuid ovddabeallai ii galgga bidjat rihku earret dalle go rihkku gullá logahallamii.

*Niillas čuojahii (go ii ollen boahtit).*

*Oahpahuvvo dárogillii, (davvi)sámegillii ja suomagillii.*

Teaksta mii lea ruođuid siste álggahuvvo álo unnabustávain, jus ruođu ovddabealde ii leat stuora gaskamearka (čuokkis, gažaldatmearka, čuorvvasmearka). Galgá nappo leat unnabustávva maiddái dalle go ruođuid siste lea dievaslaš cealkka.

*Sámmol logai guovžža doarridan iežas (mii diehtit dál ahte lei ealgabeana!) gitta viesuid lusa.*

Dán sáhttá čállit maid ná:

*Sámmol logai guovžža doarridan iežas gitta viesuid lusa. Mii diehtit dál ahte lei ealgabeana!*

### **Roahkkeruođut [ ]**

Roahkkeruođuid atnit go sitáhtas guođđá oasi.

Jus oanehis oasi guođđá, de merke ruođuid sisa golbma čuoggá.

*[...] de čatne sii seahkanjálmmi ja viehkaledje dainna stohporágigge [...].*

Jus guhkit oasi guođđá, de sáhttá merket golmmain jurddasázuin.

*Samernas-bláddái lea Pekka Kuhmunen muičalan skuvlavázzima birra dolin: "Dalle šattaimet ieža dállastit gápmagiid juohke iđida [---] eat ge beassan ngorostallat."*

Roahkkeruođut biddjojit sierra lasáhusaid birra, vai dat sirrejuvvojit eará ruođuin.

*Biilavuoddji čilgii dainna lágiin: "Ledjen juste vuoddján olgeš guvlui go nubbi biila (rukses Toyota) bodii maŋis [Suoma guovllus]".*

Roahkkeruođuid sáhttít bidjat siskkit ruohtun teavstta sisa.

*Diedžihan didjiide (geat lehpet searvan stivrii [gč. 2.5. reivve]), ahte mii eat mieđa dasa.*

Jus čálli lasiha iežas mearkkašumiid sitáhttii, de bidjá daid roahkkeruoduid sisa.

*Ovdaolmmošvttohas logai: "Olbmot [Kárášjoga báikkálaš searvi] leat vuostaldan mu suollemas vugiiguin."*

*Dan birra lea J[ohan] D[aniel] Hætta čállán.*

Jus sitáhtas lea čállinmeattáhus dahje eará boasttuvuohta, de čalesta dan maŋjái roahkkeruođuid sisa *[sic!]*, *[sic]* dahje dušše *[!]*.

*Dáppe sáhttá vánddardit luonddus ja vuodjit heargiin [sic].*

*Lávvardat lea vahku 8. [sic!] beaivi.*

*Lávvardat lea vahku 8. [!] beaivi.*

## 2 EARÁ MEARKKAT

### 2.1 Apostrofa

Apostrofas lea rihku hápmi, muhto dat lea linjá badjeravddas. Apostrofa ii leat seamma mearka go akseanta mii lea ovdamearkka dihte bustávas á. Apostrofaid hápmi rievddada iešguđet gielain: sámegielas čállit daid seammaládje go ruota-, dáro- ja suomagielas, ná: 'sátni', muhto engelasgielas dat čállojuvvojit ná: 'word'.

Apostrofaid gaskii sáhttá čállit ovdamearkka dihte sáni dahje cealkaga mearkkašumi.

*guelie 'guolli'  
Aehtjie gåetesne. 'Áhčči lea ruovttus.'*

## 2.2 Akseantamearka

Akseantamearka lea sámegielas oahpes mearka, ja sirre *a-* ja *á*-bustáva. Akseanta merkejuvvo gurut guovllus bajás olgeš guvlui. Akseanta ii leat seamma mearka go apostrofa.

Muhtun vierissániin adnojuvvo akseantamearka *e* bajábealde, válodgeattu merket.

*portemoné, supé*

Muhtin vierisgiel namain lea akseantamearka.

*Émile, René, Andalucía*

Loatnasániin akseanttat čájehit táktaráji vai vokálaovttastupmi ii lohkkojuvvo diftongan.

*filéa, filéastit*

*areála, lineára, teáhter*

*móa-loddi*

## 2.3 Gravismearka

Gravismearka merkejuvvo nuppe guvlui go akseantamearka, namalassii gurut guovllus vulos olgeš guvlui. Gravismearka adnojuvvo dušše vierronamain.

*Genève, Berlème, Jonquier*

## 2.4 Juolgenohtamearka (vuollečujuhusmearka)

<sup>1</sup>

Unna nummaraš loktosis sáni dahje čállinmearkka manjís čujuha juolgenohtii. Jus juolgenohta guoská ovttaskas sátnái, de bidjat dan njuolga sáni manjábeallai. Jus juolgenohta guoská olles cealkagii, de bidjat dan čuoggá, rihku dahje dakkára manjábeallai.

*Gaskaoali mihtidat guokte goartila<sup>1</sup> niskkis bogi rádjai.*

*Vuovdečuohppan goarida boazodoalu.<sup>2</sup>*

Jus siiddus lea dušše okta juolgenohta, de juolgenohta sadjái sáhttá maid bidjat nástti (\*).

## 2.5 Paragráfamearka

§

Paragráfamearkka atnit earret eará lágain, láhkaásahusain ja njuolggadusain ja dan čállit ná: *15. §* (vihttanuppelogát paragráfa) dahje *§ 15* (paragráfa vihttanuppelohkái).

---

<sup>1</sup> *Goartil lea sullii 15 centimehtera.*

<sup>2</sup> *Dán birra sáhtát lohkat eanet SVT neahttiiddus.*

## 2.6 Proseantamearka %

Proseantamearkka atnit dušše loguid oktavuođas. Nummara ja proseantamearkka gaskkas lea okta guoros gaska.

25 %, 100 %

Jus teavsttas ii leat nummar, de čállit *proseanta*-sáni bustávaiguin.

- *Galle proseantta mágssát vearu?*
- *Golbmalogi proseantta. (dahje 30 proseantta)*

*Sámediggái sirdojuvvo dihto proseantamearri stáhtabušeahdas sámi áššiide.*

**Fuomáš:** Ii galgga čállit %-mearri, muhto proseantamearri.

## 2.7 Mearkkaid gaska

### Mihtuid, deattuid ja sullasaččaid mearkkat

Gráda, juolgemihtru ja dumá mearkkaid ovddabealde ii leat gaska.

+25° C, 35° (gráda), 3' (juolgemihtru), 3'' (dumá)

Vuoddorehkenastinmearkkaid ovdda- ja manábeallai biddjo okta guoros gaska.

$$12 + 13 = 25$$

$$2 \times 3 = 6$$

$$3 - 2 = 1$$

$$22 : 2 = 11$$

Dáid mearkkaid: & ('ja'), < ('unnit go') ja > ('stuorit go') ovddabeallai ja maŋábeallai maid bidjat ovtta guoros gaskka.

*Nickel & Sammallahti: Nordsamisk grammatikk*

< 47

> 6

**Fuomáš:** Eat ane guoros gaskka go mearkkat + ja - gusket dihto lohkui (positiiva dahje negatiiva lohkui).

$$3 - 4 = -1$$

$$4a - (-1b + 2a)$$

$$+25^\circ C$$

## 3 SÁNIT

### 3.1 Vierissánit ja loatnasánit

Sánit mat leat boahtán eará gielain, leat jogo loatnasánit dahje vierissánit. Loatnasániin oaivvilduvvo sátni mii lea guhká leamaš anus ja heivehuvvon nu ahte sáhttá leat váttis fuobmát loatnasátnin, jos ii dovdda giellahistorjjá ja loatnasáni duogáža. Dákkár sániid giellageavaheaddjit eai láve amašit, nugo ovdamearkka dihte *mihcamárat* ja *bábir*. Vierissániin fas oaivvilduvvo loatnasátni mii ii leat ollásit heivehuvvon ja man álkibut sáhttá oaidnit álgóalgosaččat eará giela sátnin. Vierissánit leat ovdamearkka dihte latiinnagiel sánit mat eará gielaid čađa leat boahtán maiddái sámegillii, nugo ovdamearkka dihte *demokratija* ja *subjeakta*. Vierissánit sáhttet muhtomin geavahuvvot heivehalakeahes sitáhttalootnan, ovdamearkka dihte *pizza*, muhto dábálaččat dat heivehuvvojít jos daid lea váttis muđui sojahit.

Dán áigge vierissánit bohtet earenoamážit eangalsgielas.

### **Vierissániid heiveheapmi**

Moattetávttat vierissániin ii rievdda álgotákta. Dušše dat tákta mii sojahuvvo, sáni maŋimuš tákta, heivehuvvo sámegiela sátneminstarii

*filosofija, trilogija, biologija, energija, geografija, epidemiija, symfonija, aviisa, politihkka, instituhhta, bušeahutta, organisašuvdna, kanovdna, diagrámma, kapitála, kanála, turista, studeanta, akseanta, kataloga, synoniibma* (maiddái: *synonyma*), *margariidna* (maiddái: márgár), *analiiisa* (maiddái: *analysa*), *universitehta, lokatiiva, eksámen, sistema, kapihtal*

*struktureret, registreret*

*normatiiva, sosiála, nationála*

Báikenamain ii čállojuvvo goassege *-iija*-loahppa. Dan dihte čállit ovdamearkka dihte *Tansania*.

Go vierissánis dahje -namas lea dušše okta tákta ja *-ia*-loahppa, de sátni ii heivehuvvo.

*media, mafia*

Dán tákta minstara mielde heivehuvvojít maiddái dát sánit:

*symposia, privilegia*

*komedia* (maiddái: *komedijja*), *tragedia* (maiddái: *tragedijja*)

**Fuomáš:** Go vierissátni lea goalossáni mearusoassín (álgolaðasin), de dasa ii galgga lasihit eará gielaid elemeanttaid. Dan dihte čállit ovdamearkka dihte *eksámenbargu*, vrd. dárogiela *eksamensoppgave*. Nu go dán ovdamearkkas, de ii lasihuvvo dárogiela s- (goallos –s).

### Vierissániid sojaheapmi

Vierissánit sojahuvvojit nugo earánai sánit dan mielde guđe sojahanluohkkái dat gullet.

*matematihkas* (nugo *luhkas*)

*diagrámmii* (nugo *nammii*)

*eksámeniidda* (nugo *beatnagiidda*)

*systemaide* (nugo *namaide*)

*margariinnas* (nugo *viinnas*)

*lokatiivii* (nugo *niidii*)

**Fuomáš:** -*iija*-loahpas ii leat dássemolsašupmi.

*filosofija* : *filosofijas*

*energija* : *energijain*

**Fuomáš:** Sániid maid loahpas lea -*iija*, sáhttá illatiivvas sojahit guovtti ládje.

*energijii* dahje *energijai*

*biologijii* dahje *biologijai*

*geografiijii* dahje *geografiijai*

*komedijiide* dahje *komedijaide*

**Fuomáš:** Sániin main lea -ia-loahppa, bissu ovttaidlogu illatiivahámiin a.

*mediai*

*mafiai*

*komediai*

*Italiai*

### **Eará gielaid olbmonamaid sojaheapmi**

Namat berrejít čállojuvvot nu mo nammaguoddit ieža daid geavahit. Jus olmmoš guoddá dušše ovdamemarkka dihte dárogiel nammahámi, de nama ii berre heivehit sámegillii.

*Mu vilbeliid namat leat Hans-Erik ja Piera-Niillas. Hánса-Máhtte ja Per Ole eaba leat mu vilbealit.*

Teavstta álggus sáhttá atnit sihke olbmo sámegiel nama ja virggálaš nama. Das marjjil atná nama dahje namaid dan mielde movt dat heivejít vuohkkasepmosít tekstii.

*Mielkebiila gopmánii luottas eret Njávdámis. Dan oinnii Niillas Mihkkala Káre, Kaarina Mikkelsdatter Haetta. "Gal mun juo suorganin!" muitala Káre NRK Sápmái.*

Earágiel namat čállojuvvojit virggálaš nammahámi mielde, dušše (gaskavokálat ja) kásusgehčosat lasihuvvvojit.

*Dan mun gullen Seija Kovakivis ja Gaute Borgas Göteborgas.*

*Maria Mikkelsen guovttos Synnøve Åsebøniin oaččuiga journalistabálkkašumi.*

Eará gielaid namat sojahuvvojit sámegiela sojahanminstariid mielde. Sátnemáddagis sáhttá dattetge leat variašuvdna. Eará gielaid namaid sojaheapmi ii leat vel vuđolaččat guorahallon, dan dihte dás čájehuvvojit dušše dábálaččamus nammatippaid sojaheami ovdamearkkat.

-a- ja -i-loahppasaš namain ii rievdda máddaga loahppavokála go namat sojahuvvojit.

	<b>ovttaidl.</b>	<b>máŋggaidl.</b>	<b>ovttaidl.</b>	<b>máŋggaidl.</b>
<b>nom.</b>	<i>Klara</i>	<i>Klarat</i>	<i>Sari</i>	<i>Sarit</i>
<b>gen.-akk.</b>	<i>Klara</i>	<i>Klaraid</i>	<i>Sari</i>	<i>Sariid</i>
<b>ill.</b>	<i>Klarai</i>	<i>Klarайдe</i>	<i>Sarii</i>	<i>Sariide</i>
<b>lok.</b>	<i>Klaras</i>	<i>Klarain</i>	<i>Saris</i>	<i>Sariin</i>
<b>kom.</b>	<i>Klarain</i>	<i>Klaraiquin</i>	<i>Sariin</i>	<i>Sariiguin</i>
<b>ess.</b>	<i>Klaran</i>		<i>Sarin</i>	

-e- ja -o-loahppasaš bárrastávvalnamaid sáhttá sojahit dábálaš sojahanminstariid mielde. Muhtin namain dattetge máddaga loahppavokála seailu. Dát guoská maiddái dakkár namaide maid čállojuvvon hámi loahpas lea konsonánta mii ii jietnaduvvo.

	<b>ovttaidl.</b>	<b>máŋggaidl.</b>	<b>ovttaidl.</b>	<b>máŋggaidl.</b>
<b>nom.</b>	<i>Ville</i>	<i>Villet</i>	<i>Veijo</i>	<i>Veijot</i>
<b>gen.-akk.</b>	<i>Ville</i>	<i>Villiid ~ Villeid</i>	<i>Veijo</i>	<i>Veijuid ~ Veijoid</i>
<b>ill.</b>	<i>Villi ~ Villei</i>	<i>Villiide ~ Villeide</i>	<i>Veijui ~ Veijoi</i>	<i>Veijuide ~ Veijoide</i>
<b>lok.</b>	<i>Villes ~ Villein</i>	<i>Villiin ~ Villein</i>	<i>Veijus ~ Veijos</i>	<i>Veijuin ~ Veijoin</i>
<b>kom.</b>	<i>Villiin</i>	<i>Villiiguin ~</i>	<i>Veijuin ~ Veijoin</i>	<i>Veijuiguin ~ Veijoiguin</i>
		<i>Villeiguin</i>		
<b>ess.</b>	<i>Villen</i>		<i>Veijon</i>	

Namain maid loahpas lea vokála mii ii gula sámeigiela alfabehtii, seailu loahppavokála nama sojahettiin.

	<b>ovttaidl.</b>	<b>máŋggaidl.</b>	<b>ovttaidl.</b>	<b>máŋggaidl.</b>
<b>nom.</b>	<i>Henry</i>	<i>Henryt</i>	<i>André</i>	<i>Andrét</i>
<b>gen.-akk.</b>	<i>Henry</i>	<i>Henryid</i>	<i>André</i>	<i>Andréid</i>
<b>ill.</b>	<i>Henryi</i>	<i>Henryide</i>	<i>Andréi</i>	<i>Andréide</i>
<b>lok.</b>	<i>Henrys</i>	<i>Henryin</i>	<i>Andrés</i>	<i>Andréin</i>
<b>kom.</b>	<i>Henryin</i>	<i>Henryiguin</i>	<i>Andréin</i>	<i>Andréiguin</i>
<b>ess.</b>		<i>Henryn</i>		<i>Andrén</i>

Ovtastávvalnamaid sojahit dego dat livčče *-a-loahppasaš* namat.

	<b>ovttaidl.</b>	<b>máŋggaidl.</b>	<b>ovttaidl.</b>	<b>máŋggaidl.</b>
<b>nom.</b>	<i>Per</i>	<i>Perat</i>	<i>Liv</i>	<i>Livat</i>
<b>gen.-akk.</b>	<i>Pera</i>	<i>Peraid</i>	<i>Liva</i>	<i>Livaid</i>
<b>ill.</b>	<i>Perii ~ Perai</i>	<i>Peraide</i>	<i>Livii ~ Livai</i>	<i>Livaide</i>
<b>lok.</b>	<i>Peras</i>	<i>Perain</i>	<i>Livas</i>	<i>Livain</i>
<b>kom.</b>	<i>Perain</i>	<i>Peraiguin</i>	<i>Livain</i>	<i>Livaiguin</i>
<b>ess.</b>		<i>Peran</i>		<i>Livan</i>

**Fuomáš:** Ovtaidlogu illatiivvas máddaga loahppavokálan sahttá leat juogo *a* dahje *i*.

Konsonántaloahppasaš bárahisstávvalnamat sojahuvvojit bárahisstávvalmáttat nomeniid sojahanminstara mielde. Dát guoská maiddái daidda namaide maid čállojuvvon hámí loahpas lea konsonánta mii ii jietnaduvvo.

	<b>ovttaidl.</b>	<b>máŋggaidl.</b>	<b>ovttaidl.</b>	<b>máŋggaidl.</b>
<b>nom.</b>	<i>Astrid</i>	<i>Astridat</i>	<i>Øivind</i>	<i>Øivindat</i>
<b>gen.-akk.</b>	<i>Astrida</i>	<i>Astridiid</i>	<i>Øivinda</i>	<i>Øivindiid</i>
<b>ill.</b>	<i>Astridii</i>	<i>Astridiide</i>	<i>Øivindii</i>	<i>Øivindiidda</i>
<b>lok.</b>	<i>Astridis</i>	<i>Astridiin</i>	<i>Øivindis</i>	<i>Øivindiin</i>
<b>kom.</b>	<i>Astridiin</i>	<i>Astridiiguin</i>	<i>Øivindiin</i>	<i>Øivindiiguin</i>
<b>ess.</b>		<i>Astridin</i>		<i>Øivindin</i>

**Fuomáš:** Suomagiela *-nen*-loahppasaš namaid sojahit sámegiela sojahanminstara mielde. Daid sahttá maid sojahit nu ahte atná vuodđun suomagiela sojahanmáddaga.

	<b>ovttaidl.</b>	<b>máŋggaidl.</b>
<b>nom.</b>	<i>Virtanen</i>	<i>Virtanenat ~ Virtasat</i>
<b>gen.-akk.</b>	<i>Virtanena ~ Virtasa</i>	<i>Virtaneniid ~ Virtasiid</i>
<b>ill.</b>	<i>Virtanenii ~ Virtasii</i>	<i>Virtaneniidda ~ Virtasiidda</i>
<b>lok.</b>	<i>Virtanenis ~ Virtasis</i>	<i>Virtaneniin ~ Virtasiin</i>
<b>kom.</b>	<i>Virtaneniin ~ Virtasiin</i>	<i>Virtaneniiguin ~ Virtasiiguin</i>
<b>ess.</b>		<i>Virtanenin ~ Virtasin</i>

Sámi namat mat leat čállojuvvon eará gielaid čállinvugiid mielde, sojahuvvojit dego eará gielaid namat, geahča ovdalis namuhuvvon ovdamearkkaid.

*Ailo : Ailoi, Ravna : Ravnas, Maaret : Maaretii, Ande : Andiin*

## 3.2 Sátnejuohkin

Sániid sáhttá juohkit stávvaliid mielde.

### Konsonántaguovddáža juohkin

Go konsonántaguovddážis leat guokte konsonántta, de juohkit daid gaskka.

*bieb-mu, gud-ni, jog-ŋet, fas-kut, ruoš-kit, ruos-ta, bus-sá*

Go konsonántaguovddážis leat golbma konsonántta ja guokte dain leat ovttaláganat, de juohkit ovttalágan konsonánttaid gaskka.

*áhč-či, gáhk-ku, bán-no-gáhk-ku, ád-djá, viel-lja, spán-nja*

Go konsonántaguovddážis leat golbma iešguđetlágan konsonántta, de juohkit gievrras dásis nu ahte manjt oassái šaddet guokte konsonántta.

*suor-bma, sár-dni, gar-gyil, háv-ski, rám-ški, náv-sti*

Geanohis dásis manjt stávvalii báhcá dušše okta konsonántta.

*suorp-ma, sárt-ni, goark-ŋun, fierp-mit*

Sániin main leat njeallje iešguđetlágan konsonántta konsonántaguovddážis (omd. konsonánta + dnj/ -tnj), báhcá ovddit stávvalii dušše okta konsonanta, nu go sániin

*skur-dnjasat, seav-dnjat, ráv-dnji*

**Fuomáš:** *hj, hl, hm, hn, nj, ja hr* čállojuvvojit oktii dan dihte go dain lea guðesge dušše okta jietnadat. Daid nappo ii galgga juohkit.

*da-hje, skáv-hli, dui-hmi, čái-hni, ma-njis, suo-njar, sku-hrai-dit*

### Vokálaid juohkin

Diftongga ii galgga juohkit.

*oa-sus, ie-žas, ea-rán, stuo-ris*

Ii galgga juohkit stávvalráji bokte nu ahte báhcá dušše okta vokála.

*álás (\*á-lás), eret (\*e-ret), isit (\*i-sit)*

### 3.3 Stuora álgobustávat ja unna álgobustávat

Namaid čállit stuora álgobustávain, namahusaid fas unna álgobustávain.

*Áslat, Áŋŋel, Ruotta, Čebo, Suomaluodda*

*direktora, oahpaheaddji, áŋŋellaš, ruottelaš, allaskuvla*

Muhtun sániid atnit muhtomin namman, muhtomin fas namahussan. Muhtomin sáhttá leat váttis mearridit goabbá ain lea, namma vai namahus. Ovdamearkka dihte *Sápmi* lea namma go dat čujuha geográfalaš guvlui, ja *sápmi* fas lea namahus go dat čujuha olbmui, gillii ja dakkáriidda.

*Dán vahkkoloahpa lágiduvvo juoiganoasi oassefinála Ruota beale Sámis.*

*Odđa dutkan duođašta ahte sámit leat viššalat politihkvet.*

Stuora ja unna álgobustáva merken departemeanttaid (ministerijaid) namain lea iešguđet riikkain iešguđetlädje. Muhtin riikkain čállet departemeanttaid namaid válđogielas stuora álgobustávain, ja nuppiin fas unna álgobustávain. Mii čuovvut dan merkenmálle mii lea dábálaš guđege riikkas.

Skuvlaluohká namaid sáhttá čállit stuorabustávain dahje unnabustávain.

*B-luohkká, c-luohkká, 3A, 5c*

### **Stuora álgobustávva**

### **Cealkaga álggus**

Teavstta vuosttaš sánis ja cealkaga loahppačuoggá maŋis lea stuora álgobustávva.

*Mánná čierru. Áhčči vuohttu máná.*

Cealkaga loahppačuoggá maŋábealde sáhttá atnit stuora álgobustáva maiddái dalle go odđa cealkaga álggaha sátni mii muđui čállo unna álgobustávain.

*Vincent van Gogh jámii nuorran. Van Gogh dáidaga sáhttá dán geasi fitnat geahččame Oslos.*

dahje:

*Vincent van Gogh jámii nuorran. van Gogh dáidaga sáhttá dán geasi fitnat geahččame Oslos.*

*Eanas vearbbat leat bárrastávvalvearbbat. Boahtit-vearba lea okta dain.*

dahje:

*Eanas vearbbat leat bárrastávvalvearbbat. boahtit-vearba lea okta dain.*

Vuosttaš sátnái duppalčuoggá maŋábealde bidjat stuora álgobustáva go sátni álggaha cealkaga.

*Dál manai fas nu: Mii vuoittáhalaimet.*

*Oahpaheaddji álggahii: "Dál dii lehpet álgán nuoraidskuvlii!"*

*Son fuobmái dakkaviðe maid oahpaheaddji vikkai muitalit: Leage earáid vuostá nu movt ieš háliidat ahte earát galget leat du vuostá.*

*Ánte jurddašii: "Galggan go son muitalit dan maid diedán?"*

## Namain

Stuora álgobustáva atnit olbmuid, girjjiid, aviissaid, bládiid, nástegovvosiid ja almmi gáhppálagaid, elliid, visttiid ja dakkáriid namain. Mii čállit olbmuid, ásahusaid ja eará dakkáriid namaid seammaládje go sii ieža čállet.

*Ovllá, Čebo, Áššu, Áhkobiemmu, Báktehárji, Nieida Márjá, Johánas Gássttašeaddji, Gonagaslaš Majestehta Ruvdnaprinsa Haakon, Finnmark Dagblad, Norrbottens-Kuriren*

Oskku ja mytologalaš namaide bidjat maid stuora álgobustáva.

*Ipmil* (muhto: *dološ sámi ipmilat*), *Hearrá*, *Sivdnideaddji*, *Olbmobárdni*, *Juksáhkká*, *Uksáhkká*, *Venus*, *Amor*, *Jehova*, *Allah*, *Buddha*

**Fuomáš:** Go namat geavahuvvojít metaforalaččat dahje idiomáhtalaččat, de eai čállo stuora álgobustávain, nu go Ipmil čuovvovaš ovdamearkkas:

*”Vuoi ipmil árpmit go dat lei čáppat!”*

(Reivve) bajilčállagiidda, konvoluhtaide ja dakkáriidda čállit stuora álgobustáva eat ge ane čuoggá bajilčállaga ja dakkára loahpas.

*Ráhkis Niillas*

*Buorre eadni*

*Sátnejođiheaddji Anne Boine* (muhto: *Anne Boine*, *sátnejođiheaddji*)

Stuora álgobustáva čállit ásahusaid, organisašuvnnaid, fitnodagaid, servviid ja politihkalaš bellodagaid, suohkaniid ja gielddaid namaide.

*Dáloniid listu*, *Girku* (ásahussan), *Olgešbellodat*, *Ráđđehus* (ásahussan), *Sámi allaskuvla*, *Davvi-Norgga universitehtabuohcceviessu*, *Eanodaga suohkan*, *Girona gielda*, *Guovssonásti*, *Sámi oahpahusguovddáš*

**Fuomáš:** Jus ásahusat, fitnodagat ja dakkárat ieža čállet goappašat (dahje buot) osiid stuora álgobustávain, de galgá goappašat (dahje buot) osiid čállit stuora álgobustávain.

*Sámi Instituhtta*, *Sámi Arkiiva*, *Risten Ravna Bivtasduodji*, *Davvi Álbumgiid Guovddáš*, *Min Geaidnu*, *Johtti Sápmelaččat ry*, *Sámi Jienat*

Go oaniduvvon nama atnit ásahusa namman, de čállit stuora álgobustávain.

*Instituhtta, Arkiiva, Riikasearvi*

Kultuvrralaš meassuid, falástallandeaivvademiid ja dakkáriid namaid goappáge oasi dahje buot osiid čállit dábálaččat stuora álgobustávain.

*Deanu Riemut, Olympia Gilvvut, Sámi Grand Prix*

Bustáva mii bagadallá dihto hámi, čállit stuorisin.

*T-báidi, V-gorut*

#### **Unna álgobustávva**

Virgenamahusaide, ámmátnamahusaide ja dakkáriidda čállit unna álgobustáva.

*direkteinra Hætta, stáhtaministtar Löfven, presideanta Sanila-Aikio, advokáhtta Somby,  
gonagas Harald, mánáidáittardeaddji Lindmo*

Dalle go dákkár sánit čujuhit Norgga ásahusaide eai ge olbmuide, de dat čállojuvvojit stuora álgobustávain.

*Ášši ovddiduvvui Fylkkamánnái. (ásahussii)*

*Dohko lei fylkkamánni boahtán. (fylkkamánni ieš)*

*Lady, lord, sir, madame ja dakkáriid čállit unna álgobustávain go eai álggat cealkaga.*

Historjjálaš dáhpáhusaid, ja historjjálaš ja geologalaš áigodagaid namahusaide bidjat unna álgobustáva.

*eváhkodálvi, nubbi máilmisoahti dahje 2. máilmisoahti, lagi 1945 ráfi, ruovdeáigi*

**Muhto:** Go vuosttaš sátni lea namma, de dieđusge bidjat dasa stuora álgobustáva.

*Knæreda ráfi*

Nationalitehtaid, olmmoščearddaid, servviid miellahtuid, elliid, šattuid, vuosttáiid, beivviid, mánuid, áigodagaid, allabasiid namahusaid čállit unna álgobustávain.

*sápmelaččat, suopmelaččat, gironlaččat, olmmáivákkit/olmmáivákkihat, anáraččat, sosialdemokráhtat, eappel, beana, camembert, bearjadat, guovvamánnu, beassážat, heláduorastat*

Unna álgobustáva bidjat maiddái dalle go namahus lea namas bohciidan.

*jonssot, olssot, johannesláibi, ubmisámegiella, ohcejohkalaš, ruottelaš, norgalaš, helsetlaš, lestadiánalaččat, lutheránat, lutherlaččat*

**Muhto:** *Kristusa albmáimannanbeaivi (= helloduorastat dahje heláduorastat)*

Latiinnagiela elliid ja šattuid namahusaide bidjat vuosttaš sátnái (soganammii) stuora álgobustáva, ja nubbái (šládjanammii) bidjat unna álgobustáva.

*Rubus chamaemrus* (luomi), *Rangifer tarandus* (boazu), *Coregonus lavaretus* (čuovža)

Dávddaid ja vigiid namahusaid čállit unna álgobustávain. Go dávdda dahje vigi namahus lea olbmo namas bohciidan, de čállit dan stuora álgobustávain.

*gosahat, borasdávda, Alzheimer, Down syndroma*

Matematikhalaš namahusain geavahuvvo unnabustávva.

*x-sáhcu, y-čiehka*

Go dupalčuoggá maŋŋel ii leat iešheanalaš teaksta (váldocealkka), de álggahit dan unna álgobustávain.

*Sámi leavggas leat njeallje ivnni: alit, ruoksat, fiskat ja ruoná.*

*Son barggai dainna masa buoremusat liikui: sámegielain.*

## 3.4 Logut

### Nummarat vai bustávat?

Matematikkateavsttain, busse- ja girdiruktotabeallain, haddelisttuin ja dakkáriin main logut leat deatalaččamusat, logut čallojuvvojít dávjá nummariiguin. Earámállet teavsttaide gustojít čuovvovaš rávvagat:

Loguid gitta logi rádjai čállit dábálaččat bustávaiguin. Čáppagirjjálašvuodjas lea dábálaš čállit maiddái stuorát loguid bustávaiguin.

*Gáffe duldi viða minuhtas.*

*Son juoiggai golbma luodi.*

*Čoahkkin lea Diehtosiidda vuoshtaš gearddis.*

*Guokte goalmádasa olbmuin eai leat goassege jurddašan ge dan.*

*Dat dáhpáhuvai juo beannot jagi áigi.*

Go lea dárkilet loguid birra sáhka, dahje jus livčii vejolaš rehkenastit cuovkaosiiguin, de sahttá maid smávva loguid čállit nummariiguin.

*Ádjánin 2,5 diimmu. (dahje bealgoalmmát diimmu)*

*Čáhci duldi 5,3 minuhtas.*

Mađi dárkileabbo háliida leat loguid dáfus, dađi buoret lea čállit loguid nummariiguin. Desimálaloguid čállit danne álo nummariiguin.

*398,211*

Cuovkalogut čállojuvvojut nummariiguin, earenoamážit go dárkilvuoda deattuha. Dábálaš ja fásta cuovkkaid sahttá gal maid bustávaiguin čállit.

*1 ½ dahje beannot*

*2 ½ dahje bealgoalmmát dahje guokte ja bealli*

*¾ dahje golbma njealjádasa*

Olles logežiid, čuđiid, duháhiid ja miljovnnaid čállit dávjá bustávaiguin teavsttas.

*Doppe ledje moadde čuođi heakka.*

*Duhát girkes násttáža ravket.*

*Sus ii lean go vihtalogi ruvdno.*

Seamma cealkagis dahje teakstabihtás doalahit ovtta čállinvuogi, válljet loguid dahje bustávaid.

*Mus leat guokte bártni, ovcce- ja guoktenuppelohjakháččat.*

*Mus leat guokte bártni, 9- ja 12-jahkásacčat.*

Mihtuid oanádusaid fárrui čállit loguid nummariin. Logu ja oanádusa gaskii guođđit ovtta guoros gaskka.

*2 m, 9 kg, 1000 mm, 3 dl, 50 kr*

Go mihtu čállá ollásit bustávaiguin, de sáhttá válljet teakstatiippa dahje konteavstta vuodul nummariiguiin dahje bustávaiguin čállit logu.

*20 ruvnno dahje guoktelogi ruvnno, 22 mehtera dahje guoktelogiguokte mehtera*

#### **Bustávaiguin čállojuvvon logut: oktan vai moaddin sátnin?**

Loguid mat leat unnibut go miljovdna, čállit oktan sátnin.

*ciežalogigolbma, guoktelogi, vihtagoalmmátlohkái, guoktečuođi, vihtaduhát*

Loguid mat leat stuoribut go miljovdna, čállit guoktin dahje máŋgan sátnin go bustávaiguin čállit.

*logi miljovnna, guoktelogi miljárdda*

Ruhtabáhpiriidda lea dábálaš čállit loguid oktii, sihkarvuoda dihte.

Vuodđaloguid čállit dábálaččat loguiguin. Jus čállit bustávaiguin, de čállit oktan sátnin.

*1852*

*gávcenuppelohčuođivihtatalogiguokte dahje duhátgávccičuođivihtatalogiguokte*

#### **Stuora logut ja desimálalogut**

Stuora loguid čállit golbman ja golbman nummarin, olgeš guovllus logadettiin.

*8 350 000 hl čáhppesmuorjemáihli*

Desimálaloguid čállit seammaládje ovdalis rihku, muhto rihku maŋnelis čállit buot loguid oktii.

*II 240,22450*

Njealjenummarloguid sáhttá guovtti láhkai čállit, juogo oktii dahje bidjat gaskka duháhiid ja čuđežiid gaskii.

*1240 dahje 1 240*

*9999 dahje 9 999*

Rihkku sirre desimálaid, ja stuora loguid čállit golmmanummarjoavkun, desimálamearkkas logadettiin.<sup>3</sup>

*1 657 236,132*

Loguid main leat njeallje nummara desimálamearkka ovddabealde ja/dahje manjábealde, čállit oktan.

*1321,9823*

Tabeallaid dáfus lea ráva ahte ovttežat, logežat, čuđežat ja nu ain čállojuvvojit vuollálagaid.

<i>4 000 kg bohccobiergu</i>	<i>200 300,27 kr</i>
<i>300 kg luopmánat</i>	<i>18 037,20 kr</i>
<i>30 duolji</i>	<u><i>8 300.00 kr</i></u>
<i>Submi</i>	<u><i>226 637,47 kr</i></u>

### **Beaivádeapmi**

Beaivádit sáhttá sihke numerálalaččat ja alfanumerálalaččat. Go numerálalaččat beaiváda, de atná dušše nummariid. Vuosttaš nummar čujuha beaivái, nubbi mánヌui ja goalmmát vuodđalohkui. Beaivvi ja mánu nummariid gaskkas sáhttá atnit čuoggá dahje finjusázu. Jus atná čuoggá, de čuokkis adnojuvvo maiddái mánu nummara manjis. Jus fas atná finjusázu, de mánu nummara ja vuodđalogu gaskkas ii leat čuokkis, muhto gaska. Jus beaivvi ja/dahje mánu nummar lea vuollel logi, de dan ovddabeallai sáhttá bidjet nulla. Vuodđalogu sáhttá maid čállit guvttiin nummariin.

*Ohcanaigemearri dievai 31.3.2015.*

---

<sup>3</sup> Sihkarvuoda geažil (vai ii sáhte rievadadit loguid) čállet ovdamemarkka dihte báŋkkut ja dáhkádussearvvit) nummarjoavkkuid gaskii čuoggá guoros gaskka sadjái. Riikkaidgaskasaš oktavuodas ii leat dat nu buorre, danin go čuokkis dávjá geavahuvvo desimálamearkan.

*Ohcanáigemearri dievai 31/3 2015.*

*Ohcanáigemearri dievai 31.03.2015.*

*Ohcanáigemearri dievai 31/03 2015.*

Go vuodđalohku ii namuhuvvo, de mánu nummara sáhttá cállit čuoggáin dahje čuoggá haga.

*Dát dáhpáhuvai 13.10. go mii leimmet aiddo fárren ođđa vissui.*

*Dát dáhpáhuvai 13.10 go mii leimmet aiddo fárren ođđa vissui.*

Go beavemearri (dáhton) adnojuvvo sierranassii, ovdamarkka dihte reivve álggus, de dan sáhttá cállit maid riikkaidgaskasaš vuogi mielde nu ahte vuosttaš nummar čujuha vuodđalohkui, nubbi mánnui ja goalmmát beaivái. Nummariid gaskkas adnojuvvo goallossáhcu.

*Buolbmágis juovlamánu 3. beaivvi 1995*

*Buolbmágis juovlamánu 3. beaivvi 1995*

*Buolbmágis 1995-12-03*

Go beaváda alfanumerálalaččat, de atná sihke bustáavid ja nummariid. Beaivvi nummara sáhttá cállit jogo čuoggáin dahje čuoggá haga.

*Ohcanáigemearri dievai njukčamánu 3. beaivvi 2015.*

*Ohcanáigemearri dievai njukčamánu 3 beaivvi 2015.*

*Čoahkkin lei geassemánu 8.–10. beivviid 2014.*

*Čoahkkin lei geassemánu 8–10 beivviid 2014.*

## **Loguid sojaheapmi**

Go loguid čállá nummariiguin, de sojahanhámiid čállimis adnojuvvo dupalčuokkis.

Go vuodđologuide laktá sojahangehčosiid, de čállá logu maŋŋái dupalčuoggá ja dan maŋŋái fas kásusgehčosa. Máŋggaidlogus čállá maid máŋggaidlogu dovddaldaga (*t* dahje *i*).

	<b>ovttaidlohku</b>	<b>máŋggaidlohku</b>
<b>nom.</b>	<i>16</i> (guhttanuppelohkái)	<i>16:t</i> (guhttanuppelogit)
<b>gen.-akk.</b>	<i>16</i> (guhttanuppelogi)	<i>16:id</i> (guhttanuppelogiid)
.		
<b>ill.</b>	<i>16:i</i> (guhttanuppelohkái)	<i>16:ide</i> (guhttanuppelogiide)
<b>lok.</b>	<i>16:s</i> (guhttanuppelogis)	<i>16:in</i> (guhttanuppelogiin)
<b>kom.</b>	<i>16:in</i> (guhttanuppelogiin)	<i>16:iguin</i> (guhttanuppelogiiguin)
<b>ess.</b>		<i>16:n</i> (guhttanuppelohkin)

Ornetlogut (ortnetadjektiivvat) mat leat vuollel oktanuppelohkái, čállojuvvojit dábálaččat bustávaiguin. Ornetloguide (ortnetadjektiivvaide) maid loahppaoassin lea *-logát* gustojit čuovvovaš rávvagat. Čuokkis čállojuvvo dušše ovttaidlogu nominatiivahápmái. Ovttaidlogu genetiivvas ja akkusatiivvas čállit dupalčuoggá manjábeallai *da*. Eará ovttaidlogu hámiin čállit *di* ja kasusgehčosa. Máŋggaidlogu hámiide čállit sihke suorgásá *d*, vokála mii lea máŋggaidlogu dovddaldaga ovddabealde (*a* dahje *i*), máŋggaidlogu dovddaldaga (*t* dahje *i*) ja kásusgehčosa.

	<b>ovttaidlohku</b>	<b>máŋggaidlohku</b>
<b>nom.</b>	<i>16.</i> (guhttanuppelogát)	<i>16:dat</i> (guhttanuppelogádat)
<b>gen.-akk.</b>	<i>16:da</i> (guhttanuppelogáda)	<i>16:diid</i> (guhttanuppelogádiid)
<b>ill.</b>	<i>16:dii</i> (guhttanuppelogádii)	<i>16:diidda</i> (guhttanuppelogádiidda)
<b>lok.</b>	<i>16:dis</i> (guhttanuppelogádis)	<i>16:diin</i> (guhttanuppelogádiin)
<b>kom.</b>	<i>16:diin</i> (guhttanuppelogádiin)	<i>16:diiguin</i> (guhttanuppelogádiiguin)
<b>ess.</b>		<i>16:din</i> (guhttanuppelogádin)

## 3.5 Goalossánit

### Goalossáni ja sátnegihpu erohus

Guokte maŋjálas sáni ráhkadir goalossáni dalle go dat doibmet cealkagis oktan sátnin. Čielga goalossánit leat dat maid mearusoassin (álgoladásin) lea ovttaidlogu nominatiiva. Go substantiivva dahje adjektiivva ovddabealde lea substantiiva mii lea nominatiivahámis, de dat guokte sáni ráhkadir ovttas goalossáni ja čállojit oktan sátnin.

*gilvoviehkan, lávlagirji, náhkkereaddju, goarrunmašiidna, čuoiganskuovva;  
guolleváibmil, diehtoáygir, váibmoláđis; sátnelahkástit, bealljebealástallat; beallejámas;  
iešguhtege*

Nubbi čielga goalossánetiipa leat dat sánit maid vuodđooassin (maŋit lađasin) lea adjektiivasuorggádus, ovdamearkka dihte *-lágan*, *-lágaš* ja *-at-*, *-ot-*, *-laš*, *-saš-loahppasaš* suorggádusat mat gáibidit mearusoasi. Dát máksá ahte adjektiivasuorggádus ii birge okto, go ii leat vejolaš dadjat *\*Máret lea vuovttat nieida* dahje *\*Máhtte lea varat olmmoš*.

*čáhppesvarat, dulágan, dutkanvuđot, juohkebeaivválaš, juohkelágaš, oanehisvuovttat  
(nieida), oddalágan, ovtaahkásaš, ovttamielalaš, seammanammasaš*

Goalmmát čielga goalossánetiipa leat dat sánit maid vuodđooassin lea *-beallai/-beallai*, *-bealde*, *-beale*, *-geahčái/-geahčai* ja *-geahčen* ja maid mearusoassin lea earenoamáš goalloshápmi mii ii adnojuvvo eará sajiin go dáid vuodđosiid ovddabealde.

*vuolábeallai ~ vulobeallai, boaittobalde, duogábealde, davágeahčai, lulágeahčen*

Fuomáš ahte go dáid sániid: *beallai*, *bealde*, *beale*, *geahčai* ja *geahčen* ovddabealde lea genitiivahápmi, de genitiiva lea attribuhitta, ja ovttas dat ráhkadir sátnegihpu ja čállojit guoktin sátnin.

*dán beallai, Eanodaga bealde, Ruošša beale (olbmot), Máreha geahčai, min geahčen*

Go mearusoassín lea genitiivahápmi dahje adjektiivva attribuuttahápmi, de ii leat álo čielggas lea go sáhka goalossánis vai sátnegihpus. Goalossánis lea dábálaččat fásta, tearpmalágan mearkkašupmi mii lea eará go sátnegihpu mearkkašupmi.

*eatnigiella*, vrd. *eatni giella*

*Min eatnigiella lea sámegiella.*

*Márjjá áhči giella lea sámegiella, muhto su eatni giella fas lea dárogiella.*

*mánáidgirji*, vrd. *mánáid girji*

*Diibmá almmuhuvvojedje ollu oðða mánáidgirjjit.*

*Sudno mánáid girjjit leat hiluid háluid miehtá láhtti.*

*oððabeaivi*, vrd. *oðða beaivi*

*Oððajagemánu vuosttaš beaivvi gohcodit oððabeaivin dahje oððajagebeaivin.*

*Ihttin lea fas oðða beaivi.*

*guhkesbearjadat*, vrd. *guhkes bearjadat*

*Jesus russiinávlejuvvui guhkesbearjadaga.*

*Mannan bearjadat gal lei oba guhkes bearjadat!*

*čáhppesmuorji*, vrd. *čáhppes muorji*

*Mii čokkiimet sihke joŋaid, sarridiid ja čáhppesmurjiid.*

*Mat bat dát leat čáhppes murjiid?*

## **Mat eai leat goallossánit**

Jus guokte manjálas sáni eai deavdde čielga goallossáni kriteriaid (gč. ovdalis), ii ge daid mearkkašumis leat erohus čálložit dal oktan dahje guoktin sátnin, de dat eai dábálaččat leat goallossánit. Ovdamearkka dihte čuovvovaš sátnegihput eai leat goallossánit ii ge daid galgga čállit oktan sátnin.

*vássán jahki, bálddalasti konjunkšuvdna, árbevirolaš máhttu, oktasaš vásáhus, fágalaš jođiheaddji, njálmmálaš eksámen, alit oahppu, dološ muittut, birra jándora, viða geardde*

## **Goallossániid čállin**

Goallossániid čállit dábálaččat oktan sátnin sázuid ja gaskkaid haga.

*bohccobiergu, boarrásiidsiida, viehkanskuovva, ođđajahki, dáppeolmmoš, golmmamánnosaš, guovttagielat, njealjejuvllat*

Goallossánit čállojuvvojit oktan sátnin maiddái dalle go dat leat ráhkaduvvon eanet go guovtti oasis.

*boazodoalloguovlu, mánáidgárdeoahpaheaddjeoahppu, vidajagibeäivi, bargoáigešiehtadus, suohkulaborgemiesenáhkki, guovtteolbmolatnja*

Cealkaga sisdoallu sáhttá rievdat ollásit jus goallossáni oasit čállojuvvojit sierra, veardit ovdamearkka dihte čuovvovaš cealkagiid:

*Elle lea dollagáttis.*

*Elle lea dolla gáttis.*

*Boazopolitija lea váidán njealjejuvllateaiggáda gii galgá leat luoikan fievrru iežas áddjubii.*

*Boazopolitija lea váidán njealjejuvllat eaiggáda gii galgá leat luoikan fievrru iežas áddjubii.*

*Máhtte osttii bárdnásis oðða mánáid-CD.*

*Máhtte osttii bárdnásis oðða mánáid CD.*

### **Goallossáhcu goallossáni osiid gaskkas**

Goallossáni osiid gaskii čállit goallossázu dalle go:

- mearusoassi dahje vuodđooassi lea namma<sup>4</sup>

*Davvi-Ruotta, Gaska-Norga, Lulli-Sápmi, Mátta-Várjjat, Deanu-mátki,  
Nordlys-valáštallansearvi, Rimi-gávpi, Máhtte-riehpu, Risten-áhkku, Ávvir-aviisa,  
Diedut-ráidu, Giellačállosat-girji, Sámis-bláddi, Singer-goarrunmašiidna,  
Máhte-lágan*

- mearusoassi dahje vuodđooassi lea nummar, bustávva, sátni, oanádus dahje eará giellaávnnaš

*25-jahkásaš (vrd. viđajahkásaš), 1960-jagit, 2010-lohku, 50-jagibeavivi, I.-giella  
(buoret: vuosttašgiella), 1.-konsuleanta (buoret: vuosttaškonsuleanta)<sup>5</sup>,  
A4-sturrodat, b-čuokkis, D-vitamiidna, EU-riika, g-bustávva, s-geažus,  
CD-čuojanas (dahje cd-čuojanas), ISBN-nummar, HIV-infekšuvdna (dahje*

---

<sup>4</sup> Vrd. *deanufanas, gáivnongákti*.

<sup>5</sup> Fuomáš ahte dán sáni ii sáhte čállit ná: \*1.konsuleanta dahje ná: \*1. konsuleanta. Vrd. *Sámi allaskuvlla vuosttaškonsuleanta Ánte Hætta* (Ánte Hætta virgenamahus lea vuosttaškonsuleanta) ja *Sámi allaskuvlla vuosttaš konsuleanta Ánte Hætta* (Ánte Hætta lei Sámi allaskuvlla buot vuosttamuuš konsuleanta).

*hiv-infekšuvdna), MM-gilvvut, TV-eahket* (dahje *tv-eahket*), *beavdi-sáttni, boahitit-vearba, našuvdna-doaba*

- goalossátni lea ng. bálldalasti (kopulatiiva) goalossátni man osiid gaskii sáhtášii lasihit *ja-konjunkšuvnna*

<i>dulka-jorgaleaddji</i>	(Dulka-jorgaleaddji lea sihke dulka ja jorgaleaddji.)
<i>sámi-ruota (sátnegirji)</i>	(Sámi-ruota sátnegirjjis leat sihke sámi ja ruota sánit.)
<i>Dánmárku-Norga</i>	(Dánmárku-Norgii gulle sihke Dánmárku ja Norga.)
<i>genitiiva-akkusatiiva</i>	(Genitiiva-akkusatiiva lea genitiivva ja akkusatiivva oktasaš namahus.)

**Fuomáš:** Dákkár dáhpáhusain ii galgga goalossáni osiid gaskkas atnit finjusázu (/) dannego finjusáhcu máksá 'dahje'. Ovdamearkka dihte *dulka/jorgaleaddji* máksá 'dulka dahje jorgaleaddji'.

- goallostit guokte dahje eanet goalossániid oktan sátnin. Go goallostit sániid main lea oktasaš vuodđooassi, de maŋit goalossáni čállit olles hámis. Vuosttaš goalossáni vuodđooasi sadjái čállit goalossáhcu. Go goallostit guokte dahje eanet goalossániid main lea oktasaš mearusoassi, de vuosttaš goalossáni čállit olles hámis ja nuppi sánis čállit dušše vuodđooasi ja dan ovddabeallai bidjat goalossázu.

<i>mánáidskuvla + nuoraidskuvla</i>	> <i>mánáid- ja nuoraidskuvla</i>
<i>sámegiella + suomagiella + ruotagiella</i>	> <i>sáme-, suoma- ja ruotagiella</i>
<i>sámebártnit + sámenieiddat</i>	> <i>sámebártnit ja -nieiddat</i>
<i>jienastanvuoigatvuohtha</i>	> <i>jienastan ja vuoigatvuohtha</i>
<i>jienastangeatnegasvuohtha</i>	> <i>jienastan ja geatnegasvuohtha</i>

**Fuomáš:** Ná ii sahte goallostit: \*mánáid- ja nuoraid gárvodanvuogit danne go mánáid gárvodanvuogit ja nuoraid gárvodanvuogit eai leat goallossánit, muhto sátnegihput. Dáid sániid sáhttá baicca ovttastahttit ná: mánáid ja nuoraid gárvodanvuogit.

- go nubbin oassin (dábálaččat mearusoassín) lea eará giela (amaslágan) sátni, dahje vearbahápmi *ii*

<i>sioux-indiána</i>	<i>ii-imperatiiva<sup>6</sup></i>
<i>čuoigan-cup</i>	<i>pop-joavku</i>

## Guoros gaska goallossázu buohta

Goallossázu goappáge beallai ii dábálačcat guđđojuvvo guoros gaska. Dan dihte ii galgga čállit ná: *\*Risten -áhkku*, *\*Gaska- Norga*, *\*25 - jahkásaš*, *\*sáme - ja dárogiella*.

Go mearusoassin lea sátnegihppu, de mearusoasi ja goallossázu gaskii guođđit ovtta guoros gaskka.

*Muitalus sámiid birra -girji, Min Áigi -aviisa, Duolva Duottar -joavku, Boeing 737 -girdi, New Yorka -mátki, Mercedes Benz -biilamearka, ad hoc -lávdegoddi,*

*Paulus Utsi -áššedovdi, Thor Frette -rohkki, Ánde Máhtte -riehpu<sup>7</sup>, Ánne Máret -muottá<sup>8</sup>*

Go mearusoassin lea sátnegihppu mii lea goallostuvvon sázuin, de mearusoasi ja vuodđooasi gaskii ii galgga guođđit gaskka.

<sup>6</sup> Goallossánit maid álggus lea *ii*, leat dábálaččat tearpmat. Dat eai leat nu vuohkkasat, ja jus lea vejolaš, de daid berre garvit.

<sup>7</sup> Jos nama čállá ná: *Ánde-Máhtte*, de olles gihppu čállo ná: *Ánde-Máhtte-riehpu*.

<sup>8</sup> Jos nama čállá ná: *Ánne-Máret*, de olles gihppu čállo ná: *Ánne-Máret-muottá*.

*Juho-Niillas-rohkki*

*Elle-Márjá-áhkku*

*eadni-mánná-gaskavuohta<sup>9</sup>*

*15–20-jahkásas*

### 3.6 Laktapartihkkalat

Laktapartihkkalat eai birge iehčaneaset, almmá nuppi sáni haga. Dat leat álo eará sáni geažis dahje maŋábealde. Laktapartihkal muittuha sátnegaži danin go laktása guoibme- dahje guoddinsátnái. Das ii leat dábálaččat sátnedeaddu.

*Leagoson dát riekta?*

*Lea go son dát riekta?*

*Manai go Ánte?*

*Manaigo Ánte?*

Sámegiela laktapartihkkalat leat earenoamážit:

*-ba/-bai/-ban/-bas/-bat*

*-be*

*-din/-den*

*-ge/-gin/-gen*

*-ges/-gis*

---

<sup>9</sup> Fuomáš ahte dákkár goalossáni livččii vuohkkaseabbo čállit sátnegihppun: *eatni ja máná gaskavuohta*. Dákkár goalossánit adnojuvvojít dábálaččat dušše dalle go dat leat tearpmat.

*-go/-goi/-gon/-gos/-got*

*-gol/-gul*

*-han*

*-hal*

*-man*

*-mat*

*-mis*

*-nai*

*-rat/-rahkan*

*-s*

*-son*

Laktapartihkkaliid (earret *-s*) sáhhttá čállit oktii dahje sierra ovddabeale sániin.

*Dallego don juo bohtet?*

*Dalle go don juo bohtet?*

*Boarráseabbogo dat leage go Risten?*

*Boarráseabbo go dat lea ge go Risten?*

*Dál mii vuolgit. Nas don?*

*Nas de?*

**Fuomáš:** *Go-konjunkšuvnna čállit álo sierra.*

*Ánte lea boarráseabbo go Risten.*

*Dalle go mun bohten, lei mihá dálki.*

Muhtun leksemaide gullá laktapartihkal earutkeahes oassin. Dakkár leksemain laktapartihkkala ii sáhte čállit sierra. Dán listtus eai leat buot sojahanhámit mielde.

<i>almmatge</i>	<i>goitge/goittotge</i>	<i>makkárge</i>
<i>áibbasrat</i>	<i>gokkoge</i>	<i>makkárni</i>
<i>álgage</i>	<i>gokkonai</i>	<i>mallesge</i>
<i>birrarat</i>	<i>Govtge/goge/goktege</i>	<i>maninge</i>
<i>buotrat/buotrahkan</i>	<i>gopposge</i>	<i>mannege</i>
<i>dahjerat</i>	<i>gosage</i>	<i>masage</i>
<i>dahtai/datnai</i>	<i>gosanai</i>	<i>mastige/mastege</i>
<i>dakkárge</i>	<i>gosge</i>	<i>matge</i>
<i>dákkárge</i>	<i>gosnai</i>	<i>mállesge</i>
<i>dattetge</i>	<i>gostege/gostige</i>	<i>miige/mihkkege</i>
	<i>govtge/goge/goktege</i>	
<i>dállái</i>	<i>guhtege</i>	<i>mijai/miinai</i>
<i>dieđusge</i>	<i>guhtemušge</i>	<i>movtge/moge/moktege</i>
<i>diehttelasge</i>	<i>guhtenai</i>	<i>naba/nabai/nabe</i>
<i>eisege</i>	<i>huirat</i>	<i>nago</i>
<i>giiat</i>	<i>iešguhtege</i>	<i>nuba/nube</i>
<i>giige</i>	<i>jisgo</i>	<i>obanassii(ge)/oppanassii(ge)</i>
<i>goabbat</i>	<i>joksege</i>	<i>obarat</i>
<i>goabbáge</i>	<i>josgo/jusgo</i>	<i>oktage</i>

<i>goabbánai</i>	<i>juobe/juoba/joba</i>	<i>ollenge</i>
<i>goabbeliige</i>	<i>juogage</i>	<i>ollurat</i>
<i>goabbelisge</i>	<i>juogo/jogo</i>	<i>opparat</i>
<i>goabbilge</i>	<i>juoidáge</i>	<i>suige</i>
<i>goappásge</i>	<i>jusgo</i>	<i>uhcimusge</i>
<i>goappilge</i>	<i>lahkage</i>	<i>unnimusge</i>
<i>goapposge</i>	<i>mahkkege/mahkige</i>	<i>veaháge</i>
<i>goasge</i>	<i>maidba</i>	<i>veahášge</i>
<i>goasnai</i>	<i>maide(ge)/maidge</i>	
<i>goassege</i>	<i>makkárašge</i>	

## 4 OANÁDUSAT JA SYMBOLAT

Dábálaš teavsttas berre garvit dárbašmeahttun oanádusaid, ja earenoamážit čáppagirjjaláš teavsttain oanádusat eai báljo geavahuvvo ge.

*Jus ovdamearkka dihte biila billahuvvá, de šaddá vázzit.*

*Mii osttiimet earret eará láibbi ja mielkki meahccái mielde.*

*Viessu mávssii 650 000 ruvnno.*

Tabeallain, listtuin ja eará oktavuođain main lea unnán sadji, sáhttá atnit oanádusaid. Oanádusat galget leat nu oanehaččat go vejolaš.

Leat mánngalágan oanádusat. Boatkaoanádusat, goallossániid oanádusat, sátnegihpuid oanádusat, čoahkkeoanádusat ja seaguhusoanádusat. Boatkaoanádusain, goallossániid oanádusain, sátnegihpuid oanádusain ja seaguhusoanádusain lea čuokkis. Vahkkobeivviid ja mihttoovttadagaid boatkaoanádusain dábálačcat ii geavahuvvo čuokkis. Čoahkkeoanádusain ii leat dábálačcat čuokkis.

Boatkaoanádusain lea sáni loahppa guđđojuvvon čálekeahttá.

*oahp.* (oahpaheaddji), *prep.* (preposišuvdna), *ill.* (illatiiva), *s.* (siidu), *su.* (sullii), *dep.* (departemeanta), *dii.* (diibmu) *min.* (minuhtta), *sek.* (sekunda)

Muhtin ovttadagaide biddjo čuokkis, nu go *dii.* (diibmu) ja *min.* (minuhtta) vai ere sániin mat čuoggá haga mearkkašit eará.

Goallossániid oanádusain čállojuvvojit dušše álgooasit. Go goallossáni oanida, de ii galgga leat gaska vuosttaš čuoggá manjis.

*oss.jod.* (ossodatjođiheaddji), *ml.* (mánngaidloku), *dii.oahp.* (diibmooahpaheaddji),  
*st.died.* (stuorradiggediedáhus)

Sátnegihpuid oanádusain leat dušše sániid álgobustávat mielde.

*omd.* (ovdamemarkka dihte), *ded.* (dahje eará dakkár) *ee.* (earret eará)

Sátnegihpuid oanádusain eat ane guoros gaskka.

*ped.jod.* (pedagogalaš jođiheaddji)

Seaguhusoanádussan sáhttit gohčodit dakkáriid main lea sáni álgobustávva ja vel okta dahje eanet bustávat (dávjimusat konsonánttat).

*vrd.* (veardit), *gč.* (geahča), *om.* (ovdamearkan)

Čoahkkeoanádusain leat sáni álgo- ja loahppabustávat merkejuvvon.

*dr* (doavttir), *bto* (brutto), *nto* (netto), *rbł* (rubel), *Hz* (hertz), *kto* (konto), *ktonr* (kontonummar)

Vuođđoávdnasiid, mihtu ja deattu ja ruhtaovttadagaid oanádusain ii galgga leat čuokkis.

*Na* (natrium), *He* (helium)

*mm* (millimehter), *km* (kilomehter), *cm* (centimehter)

*kg* (kilográmma), *t* (tonna)

*kr* (ruvdno), *e* (euro), *c* (sente), *NOK* (Norgga ruvdno), *SEK* (Ruota ruvdno)

Oanádusat ja symbolat lohkkojít sátnin, ja danin bidjat guoros gaskka oanádusaid ja gullevaš nummara gaskii.

*13 m, 30 min., 11 s, 65 km, 75 g, 65 kg, 12 t, 10 kW, 40 W, 10 A, 12 V, 80 dB, 11 Hz, 75 %,*  
*34. §, dii. 03.00, 25 \$, 14 £ ja 40 €*

## **Initiálaohanádusat ja akronymat**

Initiálaohanádusas (álgobustávvaohanádusas) leat sániid dahje sátneosiid álgobustávat. Initiálaohanádusain eat ane guoros gaskka. Initiálaohanádusaide ii biddjo čuokkis.

*ON* (Ovtastuvvan našuvnnat)

*SPR* (Sámi Parlamentaralaš Ráđđi)

*SGS* (Suoma Sámiid Guovddášsearvi)

*NBR* (Norgga Boazosápmelaččaid Riikkasearvi)

*RSÄ* (Riikkasearvi Sámi Ätnam)

*NSR* (Norgga Sámiid Riikkasearvi)

*OS* (oasussearvi)

Muhtin initiálaohanádusat geavahuvvojít dušše čálalaš hápmin, muhto lohkamis geavahuvvojít dievaslaš hámít.

*SA* (Sámi allaskuvla)

*SD* (Sámediggi)

*SDÁ* (Sámi dieđalaš áigečála)

Muhtun initiálaohanádusaid sáhttá čállit juogo unnabustávaiguin dahje stuorabustávaiguin. Dákkár oanádusat eai leat dábálaččat namat.

*PC* dahje *pc*, *EKG* dahje *ekg*, *TV* dahje *tv*, *CD* dahje *cd*

Go dákkár oanádusa sojaha, de lea vuohkkaseabbo atnit stuorabustávaid.

*PC:in, EKG:i, TV:s, CD:t*

Oanádusaid maid lohkat oktan sátnin, eat ge stáve bustávaid mielde, gohčodit akronyman dahje oanádussátnin. Daid sáhttá čállit stuora álgobustávain ja muđui unnabustávaiguin, dahje dušše stuorabustávaiguin.

*Unesco/UNESCO, Nato/NATO*

Muhtun riikkaidgaskasaš oanádusain leat stuorabustávat ja unnabustávat seahkálaga, ii ge dáin oanádusain leat čuokkis loahpas.

*dB, pH, MHz, kHz*

Riikkaidgaskasaš oanádusaid main stuorabustávat ja unnabustávat čállojuvvojit seahkálaga, gal čállit unna álgobustávain vel čuoggá maŋábeallai nai (cealkaga álggus).

*Dutkit leat mihtidan min juhkančázi. pH-dássi lei beare allat.*

#### **Initiálaonádusaid ja akronymaid sojaheapmi**

Initiálaonádusaide lasihuvvo dupalčuokkis ja kásusgeažus. Mányggaidlogu hámíide lasihuvvo maiddái mányggaidlogu dovddaldat (*t dahje i*).

	<b>ovttaidlohku</b>	<b>mányggaidlohku</b>
<b>nom.</b>	<i>ON</i>	<i>ON:t</i>
<b>gen.-akk.</b>	<i>ON</i>	<i>ON:id</i>
<b>ill.</b>	<i>ON:i</i>	<i>ON:ide</i>
<b>lok.</b>	<i>ON:s</i>	<i>ON:in</i>

**kom.** *ON:in* *ON:iguin*

**ess.** *ON:n*

**nom.** *NATO*

**gen.-akk.** *NATO*

**ill.** *NATO:i*

**lok.** *NATO:s*

**kom.** *NATO:in*

**ess.** *NATO:n*

### **Eará gielaid initiálaoanádusat**

Jus sámegillii ii leat vástideaddji oanádus sajáiduvvan, de doalahuvvo álgogiela oanádus. Teavsttas sáhttá čilget sámegillii mii dat lea oanádusaid.

*NAF* (Norges Automobil Forbund)

*IMDi* (Integrerings- og mangfoldsdirektoratet)

*Kela* (Kansaneläkelaitos)

*NAV* (Arbeids- og velferdsforvaltningen)

*SR* (Sveriges Radio)

*STT* (Suomen Tietotoimisto)

*USA* (United States of America)

*LKAB* (Luossavaara-Kiirunavaara AB)

## Dávjá geavahuvvon oanádusat

Dás leat oanádusat mat eanemusat adnojít davvisámegielas.

*A* ampera

*abstr.* abstrákta

*adv.* advokáhtta

*affekt.* affektiiva

*ašg.* anárašgiella

*anat.* anatomiija

*art.* artihkkal

*ásg.* áhkkiilsámegiella

*b.* beaivi

*bb.* bajábealde

*bb.* borranbaste

*bc.* bálkáceahkki

*be* bearjadat

*bfr* Belgia franc

*biol.* biologiija

*BNB* brutto nášunalbuvta

*bot.* botanihkka

*bsg.* bihtánsámegiella

*BT* Boares Testameanta

*bto* brutto

°C celsiusgráda

c/o care off = orrume soapmása luhtte

*cal.* kalorijja

*CD ~ cd* compact disk

*cg* centigrámma

*cl* centilihtar

*cm* centimehter

*čuovv.* čuovvovaš

*D* davvi

*d.* dahje

*d.* dearvvuođat

*dáb.* dábalaš

*dár.* dárogiella

*dB* desibel

*db.* deadjabaste

*ded.* dahje eará dakkár/dakkárat

*Dep* departemeanta (boastačujuhusain)

*dem.* demonstratiiva; deminutiiva

*dept.* departemeanta

*dg* desigrámma

*di* disdat

*dii.* diibmu

*dj.* dán jagi

*dir.* direkterva

*Dkr* Dánmárkku ruvdno

*DKK* Dánmárkku ruvdno

- dl* desilittar
- dm* desimehter
- doaimm.* doaimmaheaddji
- dr* doavttir
- drsg.* dárjjesámegiella
- dsg.* davvisámegiella
- du* duorastat
- duodð.* duoðaštus
- eang.* eangalasiella
- ee.* earret eará
- EKG ~ ekg* elektrokardiogramma
- enyg.* engelassiella
- euf.* eufemisttalaš
- eur.* eurohpálaš
- °F* Fahrenheit-gráda
- fig.* figuratiiva
- FIM* Suoma márki
- FM* frekveansamudden
- fr.* fránskkagiella
- fr* Fránkriikka franc
- fuom.* fuomáš
- g* grámma
- g.* gáhtta
- ga* gaskavahkku
- gaskab.* gaskaboddosaš; gaskabeaivi

*gc.* geahča

*geogr.* geografalaš

*geom.* geometriija

*gl.res.* gonagaslaš resolušuvdna

*gm.* gaskamearálaš

*govv.* govvideaddji

*gsg.* gielddasámegiella

*hg* hektogramma

*hhus* hálldahus

*hl* hektolihtar

*Hz* hertz

*ing.* ingenevra

*ISBN* girjji internationála standárdanummar

*ISSN* áigečállaga internationála standárdanummar

*J* joule

*j* jahki

*j.* jápmán

*jd.* ja dakkár(at)

*je.* ja eará

*jed.* ja eará dakkár(at)

*jna.* ja nu ain

*jnr* journalnummar

*jr* junior, nuorat

*jsg.* julevsámegiella

*jur.* juridihkalaš

*K* Kelvin-gráda

*kand.* kandidáhtta

*kap.* kapihtal

*kard.* kardinálanumerála, vuodđdolohku

*kat.* kataloga; katolalaš; kategoriija

*kB* kilobyte

*kg* kilográmma, kilo

*kl.* klássa

*km* kilomehter

*km/dii.* ~ *km/h* kilomehtera diimmus

*konkr.* konkrehta

*korr.* korrektuvra

*kr* kruvdno, ruvdno

*KS* kommandihttasearvi

*kV* kilovolta

*kVA* kilovoltampere

*kW* kilowatt

*kWh* kilowattdiibmu

*l* lihtar

*L* lulli

*lab.* laboratoriija

*lá* lávvordat, lávvardat

*lád.* lassiárvodivat

*lat.* latiinnagiella, láhtengiella

*lingv.* lingvistihkka

*log.* logaritma

*LSD* ~ *lsd* lysergasivradietylamiida

*lsg* lullisámegiella

*M* máddi

*m* mehter

*m<sup>2</sup>* njealjehasmehter

*ma* manjnebárga

*má* mánnodat

*mat.* matematihkka

*matem.* matematihkka

*MB* megabyte

*med.* medisiidna

*mbb.* mehtera meara bajábealde

*mg* milligrámma

*MHz* megahertz

*milj.* miljovdna

*min.* minuhtta, minukta

*miner.* minerála

*mk* márki

*m.Kr.* manjnel Kristusa

*ml* millilihtar

*mm* millimehter

*mrd.* miljárda

*MS* mohtorskiipa

*msg.* máttasámegiella

*mus.* musihkka

*mV* millivolt

*MW* megawatt

*mW* milliwatt

*N* Newton

*N* nuorta

*N* Norga

*nam.* namalassii

*NN* nomen nescio = namahus go olbmo namma ii namuhuvvo

*Nkr* Norgga ruvdno

*NOK* Norgga ruvdno

*neg.* negatiiva

*ng.* nu gohčoduvvon

*nr* nummar

*nto* netto

*num.* numerála, lohkosátni

*O* oarji

*od.prp.* odeldiggeproposišuvdna

*o.Kr.* ovdal Kristusa

*om.* ovdamearkan

*omd.* ovdamearkka dihte

*ON* Ovtastuvvan našuvnnat

*op.* opus

*OS* oasussearvi

*oss.* ossodat

*oss.jod.* ossodatjodiheaddji

*OT* Odđa Testamenta

*p.* persovdna

*par.* paragráfa

*Pb.* poastaboksa

*PC ~ pc* persovnnalaš dihtor

*pers.* persovdna

*pH* pondus hydrogenii = suvrodatdássi

*pos.* positiiva

*p.r.* poste restante

*PS ~ ps* postskriptum = mađilčála

*pst.* proseanta

*psyk.* psykologija

*pta* pesetas

*R* Ruotta

*r.* riegádan

*rieg.* riegádan

*rádd.* ráđđehus

*rbł* rubel

*reg.* regisztár; registrerejuvpon

*reg.nr* regisztarnummar

*rek.* rekommenderejuvpon

*rel.* religiov dna

*relat.* relatiiva

*relig.* religiov dna

*res.* resolušuvdna

*rs* registrerejuvpon searvi

*ruot.* ruotagiella

*s* sekunda

*S* Suopma

*s.* siidu

*SAÁO* skuvlaastoáiggeortnet

*sá* sámegiella

*sám.* sámegiella

*sápm.* sápmelaš

*sek* sekunda

*SEK* Ruota ruvdno

*sfr* Šveicca franc

*siviling.* sivilingenevra

*skand.* skandinávalaš

*so* sotnabeaivi

*sos.* sosiála; sosialista, sosialisttalaš

*sos.dem.* sosialdemokráhta(laš)

*SS* steamship, dámpaskiipa

*st.* stašuvdna

*St.* (*S:t*, *St*) bassi

*st.died.* stuoradiggediedáhus

*st.prp.* stuoradiggeproposišuvdna

*stip.* stipendiáhtta

*stud.* studeanta

*su.* sullii

*suom.* suomagiella

*t* tonna

*tab.* tabealla

*tb.* teadjabaste

*tekn.* teknihkka

*temp.* temperatuvra; temporála

*tti.* tiibma

*tlf.* telefov dna

*tlg.* telegrámma

*TV ~ tv* televišuv dna

*usg* ubmisámegiella

*V* volt

*vol.* volum

*vrd.* veardit

*vást.* vástádus

*vulg.* vulgára

*W* watt

*yd* yard

## GIRJJÁLAŠVUOHTA

Guttorm, Vesa & Kemi, Kjell & Helander, Nils Ø. 1993: *Muhtun giellagažaldagat*.  
[Guovdageaidnu]: Sámi Oahpahusráđđi.

Institutet för språk och folkminnen. <http://www.sprakochfolkminnen.se/> (9.11.2015)

Itkonen, Terho & Maamies, Sari 2012: *Uusi kielipas*. Helsinki: Tammi.

Kotimaisten kielten keskus. <http://www.kotus.fi/> (9.11.2015)

Kåven, Brita & Jernsletten, Johan & Nordal, Ingrid & Eira, John Henrik & Solbakk, Aage 1995: *Sámi – dáru sátnegirji. Samisk – norsk ordbok*. Kárášjohka: Davvi Girji.

Nickel, Klaus Peter & Sammallahti, Pekka 2011: *Nordsamisk grammatikk*. Karasjok: Davvi Girji.

Sammallahti, Pekka 1994: Sátnegoalosteapmi ja čállinvuohki. – Vesa Guttorm (doaimm.), *Tearbmasymposia raporta*. Dieđut 3/1994. Guovdageaidnu: Sámi Instituhtta. 35–42.

Sammallahti, Pekka & Nickel, Klaus Peter 2006: *Sámi-duiskka sátnegirji. Saamisch-deutsches Wörterbuch*. Kárášjohka: Davvi Girji.

*Sámi diedalaš áigečállaga čállinrávvagat.* <<http://site.uit.no/aigecala/callinravvagat/>> (9.11.2015).

Språkrådet. <<http://www.sprakradet.no/>> (9.11.2015)

*Svenska skrivregler*. 2008. Språkrådets skrifter 8. Stockholm: Liber.

Svonni, Mikael 2013: *Davvisámegiela – ruotagiela. Ruotagiela – davvisámegiela sátnegirji. Nordsamisk – svensk. Svensk – nordsamisk ordbok*. Karasjok: ČálliidLágádus.

Søyland, Aud & Fretland, Jan Olav 2015: *Norske skriveregler. Reglene du trenger for å skrive på papir og skjerm*. [Oslo]: Samlaget.

Vinje, Finn-Erik 2009: *Skriveregler*. [Oslo]: Aschehoug.